

宋

史

三一



志卷第六十六

宋史一百十三

開府儀同三司上贊蠻國事前書若登相異國須經筵事都總裁脫脫等奉

勅修

禮十六

嘉禮四

賜
宴饗

游觀

宴饗之設所以訓恭儉示惠慈也宋制嘗以春秋之季仲及聖節郊祀籍田禮畢巡幸還京凡國有大慶皆大宴遇大災大札則罷天聖後大宴率於集英殿次宴紫宸殿小宴垂拱殿若特旨則不拘常制凡大宴有司預於殿庭設山樓排場為群僕隊仗六番進

貢九龍五鳳之狀司天鷄唱樓於其側殿上陳錦繡
帷帯垂香毬設銀香獸前檻內藉以文茵設御茶床
酒器於殿東北楹間群臣鹹掌於殿下幕屋設宰相
使相樞密使知樞密院參知政事樞密副使同知樞
密院宣徽使三師三公僕射尚書丞郎學士直學士
御史大夫中丞三司使給諫舍人節度使兩使留後
觀察團練使待制宗室遙郡團練使刺史上將軍統
軍軍廂指揮使坐於殿上文武四品以上知雜御史
郎中郎將禁軍都虞候坐於朵殿自餘升朝官諸軍
副都頭以上諸蕃進奉使諸道進奉將軍以上分於

兩廡宰臣使相坐以繡墩

用曲

宴行
机子

幸

參知政事以下

用二蒲墩加罽毯

曲宴樞密使副並同

軍都指揮使以上用一

蒲墩自承殿而下皆緋緣氈條席殿上器用金餘以銀其日樞密使以下先起居訖當侍立者升殿宰相

率百官入宣徽閣門通唱致辭謝宰相升殿進酒各

就坐酒九行每上舉酒群臣立侍次宰相次百官舉

酒或傳旨命爵即擗笏起飲再拜曲宴多或上壽朝

會止令滿酌不勸中飲更衣賜花有差宴訖蹈舞拜

謝而退建隆元年大宴於廣德殿酒九行而罷乾德

元年十一月南郊禮成大宴廣德殿謂之飲福是後

三年開寶三年五年六年七年八年並設秋宴于大明殿以長春節在二月故也太平興國之後止設春宴在大明者十一在含光者六宴日親王樞密使副宣徽三司使駙馬都尉皆侍立軍校自龍武四廂都指揮使以上立於庭其宴契丹使亦於崇德殿但近臣及刺史郎中而上預焉淳化四年正月以南郊禮成大宴含光殿直史館陳靖上言古之饗宴者所以省禍福而觀威儀也故宴以禮成賓以賢序風雅之作茲為盛焉伏見近年內殿賜宴群臣當坐於朵殿兩廊者拜舞方畢趨馳就席品列之序糾紛無別及

至尊舉爵群臣起立先後不整俯仰失節欲望自今
令有司預依品位告諭其有踰越班次拜起失節喧
譁過甚者並令糾舉又惟飫賜之典以寵武夫大烹
之餘故為盛饌計一飯所費可數人之屬厭而將校
輩或至終宴之時尚有欲炙之色蓋執事者失於察
視不及潔豐而使然也伏望並申嚴制至道元年三
月御史中丞李昌齡亦言廣宴之設以均飫賜得齒
高會宜乎盡禮而有位之士鮮克致恭當糾其不恪
又供事禁庭當定貟數籍姓名以謹其出入酒殼之
司或虧精潔望分命中使巡察並從之咸平三年二

月大宴含光殿自是始備設春秋大宴五年御史臺
言大宴起居舍人司諫正言三院使御史並坐于殿
廊望自今移升采殿自餘依舊十二月詔凡內宴宗
正卿令升殿坐班次依合班儀翰林學士梁顥請以
春秋大宴小宴賞花行幸次為四圖頒下閣門遵守
從之景德二年九月詔曰朝會陳儀衣冠就列將以
訓上下彰文物宜慎等威用符紀律况屢頒於條令
宜自顧於典刑稍歷歲時漸成懈慢特申明制以儆
具僚自今宴會宜令御史臺預定位次各令端肅不
得誼譁違者殿上委大夫中丞采殿委知雜御史侍

御史廊下委左右巡使察視彈奏內職殿直以上赴
起居入殿庭行私禮者委閣門彈奏其軍員令殿前
侍衛司各差都校一人提轄但虧失禮容即送所屬
勘斷訖奏仍令閣門宣徽使互相察舉敢蔽匿者糾
之大中祥符元年十二月詔宣徽院御史臺閣門殿
前馬步軍司凡內宴臣僚軍員并祇候使臣等並以
前後儀制曉諭務令遵稟違者密具名聞其軍員有
因酒言詞失次及醉仆者即先扶出或遣殿前司量
添巡檢軍士護送歸營又詔臣僚有託故請假不赴
宴者御史臺糾奏天禧四年直集賢院祖士衡言大

宴將更衣群臣下殿然後更衣更衣後再坐則群臣
班于殿庭候上升坐起居謝賜花再拜升殿仁宗天
聖三年監察御史朱諫言伏見大宴宗室先退允為
得禮尚有文武臣僚父子兄弟者皆預再坐欲望自
今內宴百官有父子兄弟叔姪同赴再坐時卑者先
退慶曆七年御史言凡預大宴并御筵其所賜花並
湏戴歸私第不得更令僕從持戴違者糾舉熙寧二
年正月閣門言準詔裁定集英殿宴入殿人數中書
二十二人樞密院三十人宣徽院八人親王八人昭
德軍節度使兼侍中曹佾三人皇親使相三人皇親

正刺史已上至節度使并駙馬都尉各一人翰林司
一百七八十八人御厨六百人儀鸞司一百五十人祇
候庫二十人內衣物庫七人新衣庫七人內弓箭庫
三人鈴轄教坊所三人鐘鼓樓一十六人御藥院八
人內物料庫九人法酒庫一十六人內酒坊八人入
內內侍省前後行親事官共五人皇城司職員手分
二人御史臺知班一十一人灑掃親從官人員已下
一百人兩廊覲步親從官四十二人提舉司勾押官
手分三人提舉火燭巡檢人員一十人快行親從官
一十一人支散兩省花後苑造作所工匠等四人客

省承授行首八人四方館職掌二人閣門承受行首
已下十八人是歲十一月以皇子生宴集英殿七
年九月詔自今大宴親王皇親使相樞密使副使宣
徽使駙馬都尉並於殿門外幕次就賜酒食舊制會
食集英西廊之廡下喧卑為甚權發遣宣徽院吳充
奏其事故有是命元豐七年二月大宴集英殿命皇
子延安郡王侍立宰相王珪等率百官廷賀詔曰皇
家慶事與卿等同之珪等再拜稱謝久之王乃退時
王未出閣帝特令侍宴以見群臣九年閣門言大宴
不用兩軍妓女只用教坊小兒之舞王拱辰請以女

童代之八年詔罷獨看故事大宴前一日御殿閱百
戲謂之獨看脩國史范祖禹言是日進神宗紀草陞
下覽先帝史冊甫畢即觀百戲理似未安故請罷之
元祐二年九月經筵講論語徹章賜宰臣執政經筵
官宴于東宮帝親書唐人詩分賜之三年六月罷春
宴八月罷秋宴以魏王出賓翰林學士蘇軾不進教
坊致語故也是後以時雨未足集英殿試舉人尚書
省火禁中祈禳邠國公主未敢皆罷宴凡大宴有故
而罷則賜預宴官酒饌于閣門朝堂升殿官雖假故
不從游宴亦遣中使就第賜焉親王中書樞密宣徽

三司使副學士步軍都虞候以上三師三公東宮三
師三公以下曾任中書門下致仕者亦同凡外國使
預宴者祥符中宴崇德殿夏使於西廊南赴坐交使
以次歇空進奉押衙次交州契丹舍利後人則於東
廊南赴坐四年又升甘州交州於朵殿夏州押衙於
東廊南頭歇空坐七年龜茲進奉人使歇空坐於契
丹舍利之下其後又令龜茲使副於西廊南赴坐進
奉押衙重行於後瓜州沙州使副亦於西廊之南赴
坐其餘大略以是為準大觀三年議禮局上集英殿
春秋大宴儀其日預宴文武百僚詣殿庭東西相向

立皇帝出御需雲殿閣門內侍管軍等起居皇帝降坐御集英殿鳴鞭殿中監已下通班起居殿中監少監升殿通喚閣門官升殿攝左右軍巡使鞞笏起居訖繫鞅執杖侍立餘非應奉官分出次鐘鼓樓節級就位四拜起居次舍人通喚訖分引群官橫行北向東上閣門官贊大起居班首出班俛伏跪致辭訖俛伏興復位群官再拜舞蹈又再拜贊各就坐再拜舍人分引升殿席前相向立朵殿兩廡官立於席後有遼使則舍人引大遼舍利西入大起居贊各就坐贊再拜贊就坐引升西廊次舍人傳事引役人分入四

拜起居謝坐並同舍利儀教坊使以下通班大起居
看醕人謝升殿再拜內侍進御茶床殿侍酌酒訖次
贊天武門外祗候東上閣門官詣御坐奏班首姓名
以下進酒舍人分引殿上臣僚橫行北向贊再拜舍
人引班首稍前東上閣門官接引詣御坐東北向搢
笏殿中監奉盤醕授班首少監啓醕以酒注之班首
奉詣御前進訖少退虛跪興以槃授殿中監出笏東
上閣門官引退舍人接引復位贊再拜舍人引班首
稍前殿上臣僚席前相向立東上閣門官接引詣御
坐東北向搢笏殿中監授槃奉詣御前西向立樂作

皇帝飲訖舍人分引殿上臣僚橫行北向東上閣門
引班首接餽退虛跪興授餽殿中監出笏引退舍人
接引復位贊再拜贊各賜酒群臣再拜贊各就坐群
官皆立席後復贊就坐酒初行群官擧笏受酒先宰
相次百官皆作樂皇帝再舉酒並殿中監少監進群臣俱立
席後樂作飲訖贊各就坐復行群臣酒飲訖皇帝三
舉酒皆如第一之儀尚食典奉御進食太官設群臣
食樂作賜祇應臣僚酒食贊謝拜訖復位皇帝四舉
酒並典御進酒樂工致語群官皆立席後致語訖贊百官
再拜就坐樂作皇帝五舉酒樂工奏樂庭下舞隊致

詞樂作舞隊出東上閣門奏再坐時刻俟故隊訖內侍舉御茶床皇帝降坐鳴鞭群臣退賜花再坐前二刻御史臺東上閣門催班群官戴花北向立內侍進班齊牌皇帝詣集英殿百官謝花再拜又再拜就坐內侍進御茶床皇帝舉酒殿上奏樂庭下作樂皇帝再舉酒殿上奏樂庭下舞隊前致語樂作出皇帝三舉酒四舉酒皆如上儀若宣示醕即隨所向閣門官以下揖稱宣示醕躬贊就坐若宣示醕即立席後躬飲訖贊再拜內侍舉御茶床舍人引班首以下降階再拜舞蹈又再拜訖分班出閣門官側奏無公事皇帝

降坐鳴鞭集英殿飲福大宴儀初大禮畢皇帝遂頓飲福
餘酒封進入內宴日降出酒旣三行泛賜預坐臣僚飲福
酒各一醕群臣飲訖宣勸各興立席後贊再拜謝訖復
坐飲並如春秋大宴之儀紹興十三年三月三日詔宴
殿陳設止用緋黃二色不用文繡令有司遵守更不制造
五月閣門修立集英殿大宴儀注乾道八年十二月詔
今後前宰相到闕如遇赴宴賜茶其合坐墩杌非特旨
並依官品又行門禁衛諸色祗應人依紹興例並賜絹
花自是惟元旦生辰郊祀及金使見辭各有宴然大宴
視東京時則亦簡矣曲宴凡幸苑囿池籞觀稼畋獵所

至設宴惟從官預謂之曲宴或宴大遼使副于紫宸殿
則近臣及刺史正郎都虞侯以上預暮春後苑賞花釣
魚則三館祕閣皆預太祖建隆元年七月親征澤潞宴
從臣于河陽行宮又宴韓令坤已下於禮賢講武殿賜
襲衣器幣鞍馬以賞澤潞之功也四年四月宴從臣於
玉津園乾德三年七月六日詔皇弟開封尹宰相樞密使
翰林學士中書舍人泛舟後苑新池張樂宴飲極歡而
罷是歲重陽宴近臣於長春殿太宗太平興國九年三
月十五日詔宰相近臣賞花於後苑帝曰春氣暄和萬
物暢茂四方無事朕以天下之樂為樂宜令侍從詞臣

各賦詩帝習射于水心殿雍熙二年四月二日詔輔臣三司使翰林樞密直學士尚書省四品兩省五品以上三館學士宴于後苑賞花釣魚張樂賜飲命群臣賦詩習射賞花曲宴自此始三年十二月一日大雨雪帝喜御玉華殿詔宰臣及近臣謂曰春夏以來未嘗飲酒今得此嘉雪思與卿等同醉又出御製雪詩令侍臣屬和後凡曲宴不盡載真宗咸平元年二月二十二日宴群臣于崇德殿不作樂二年八月七日再宴用樂二月晦賞花宴于後苑帝作中春賞花釣魚詩儒臣皆賦遂射于水殿盡歡而罷自是遂為

定制四年十一月二十日御龍圖閣曲宴詔近臣觀
太宗草行飛白篆籀八分書及畫景德二年十二月
五日宴尚書省五品諸軍都指揮使以上契丹使于
崇德殿不舉樂以明德太后喪制故也時契丹初來
賀承天節擇膳夫五人齎本國異味就尚食局造食
詔賜膳夫衣服銀帶器帛六年七月二十九日詔輔
臣觀栗于後苑御山子觀御製文閣御書及嘉禾圖
賜飲是日皇子從游四年七月十一日詔近臣及寇
準馮拯觀內苑穀遂宴于玉宸殿十月二十九日詔
皇太子宗室近臣諸帥赴玉宸殿翠芳亭觀稻賜宴

仍以稻分賜之仁宗天聖二年旣禫除百官五表請
聽樂而秋燕用樂之半詔輔臣曰昨日宴宮中朕數
四上勉皇太后聽樂王欽若以聞太后太后曰自先
帝棄天下吾終身不欲聽樂皇帝再三爲請其可重
違乎明年上元節乃朝謁景靈上清宮啓聖院相國
寺還御正陽門宴從官觀燈次日太后召命婦臨觀
及春秋大宴歲爲常夏觀南御莊刈麥秋瑞聖園刈
穀並宴從官或射不爲常皇祐五年後苑寶政殿刈
麥謂輔臣曰朕新作此殿不欲植花歲以種麥庶知
稼事不易也自是幸觀穀麥惟就後苑春夏賞花釣

魚則歲為之嘉祐七年十二月特召兩府近臣三司副使臺諫官皇子宗室尉馬都尉管軍臣僚至龍圖天章閣觀三聖御書及寶文閣為飛白分賜下逮館閣官製觀書詩賜韓琦以下和進遂宴群玉殿傳詔學士王珪撰詩序刊石于閣數日再會天章閣觀三朝瑞物復宴群玉殿酒行上曰天下久無事今日之樂與卿等共之宜盡醉勿復辭因召韓琦至御榻前別賜一大卮出禁中名花金盤貯香藥令各持歸莫不酩醉至暮而罷熙寧元年四月御史中丞滕甫言臣聞君命召不俟駕此臣子所以恭其上也今錫宴

而有託詞不至者甚非恭上之節也請自今宴設群臣非大故與實有疾病無得託詞仍令御史臺察舉二年八月實錄書成皆宴垂拱殿十月修定閣門儀制所言垂拱殿曲宴當直翰林學士與觀文資政龍圖寶文樞密直龍圖天章寶文閣直學士並赴坐而翰林學士兼他職者不預考之官制似未齊一請自今曲宴翰林學士與雜學士並赴從之元豐五年七月以兩朝國史書成宴于垂拱殿十一月宴景靈宮祠官于紫宸殿元祐二年九月經筵講論語徹章賜宰臣執政經筵官宴于東宮帝親書唐人詩賜之紹聖

三年十一月以進神宗皇帝實錄畢曲宴宰臣執政
文臣試侍郎武臣觀察使以上并修國史官赴坐元
符元年五月詔受寶畢宴于紫宸殿宰臣以下文臣
職事官六曹員外郎監察御史以上武臣即將諸軍
副指揮使以上預坐政和二年三月上已御筵詔令
移用他日以國有故宰臣請罷宴故也大觀三年議
禮局上垂拱發曲宴儀皇帝視事畢東上閣門進呈
坐圖舍人奏閣門無公事皇帝降坐鳴鞭入殿後閣
諸司排設備東上閣門附內侍奏班齊皇帝出閣升
坐鳴鞭三公直學士以上親王使相至觀察使以上

分東西入詣殿庭橫行北向立定班首奏聖躬萬福
舍人贊各就坐再拜訖分引詣東西階升殿席前相
向立次教坊使以下常起居次者鹹人謝升殿次內
侍進御茶床殿侍酌酒訖閤門詣御坐躬奏班首姓
名以下進酒舍人分引殿上臣僚橫行北向贊再拜
班首奉酒躬進樂作皇帝飲訖舍人贊各賜酒群官
俱再拜贊各就坐群官皆立席後復贊就坐酒初行
先宰相次百官皆作樂後準此 尚食典奉御進食太官

令設群官食酒五行若宣示鹹即隨所向閤門揖稱
宣示鹹躬贊就坐若宣勸即立席後躬飲贊再拜內

侍舉御茶床舍人引班首以下降階橫行北向再拜分班出皇帝降坐上已重陽賜宴儀其日預宴官以下並赴宴所就次諸司排設備預宴官以下詣庭中望闕位立次中使詣班首之左稍前立中使宣曰有敕在位官皆再拜訖中使宣曰賜卿等御筵在位官皆再拜擣笏舞蹈又再拜中使退預宴官分東西升階就坐酒行樂作飲訖食畢樂止酒五行預宴官並興就次賜花有差少頃戴花畢與宴官詣望闕位立謝花再拜訖復升就坐酒行樂作飲訖食畢樂止酒四行而退

游觀天子歲時游豫則上元幸集禧觀相國寺御宣
德門觀燈省夏幸金明池觀水嬉瓊林苑宴射大祀
禮成則幸太一宮集禧觀相國寺恭謝或詣諸寺觀
焚香或至近郊閱武觀稼其事蓋不一焉太祖建隆
元年四月幸玉津園是後凡十三臨幸九月幸宜春
苑是後觀習水戰者二十有八幸大相國寺封禪寺
者各五龍興寺及皇弟開封尹園各三幸太清觀建
隆觀者再崇夏寺廣化寺等覺寺者各一觀水硙者
八閱砲車觀水櫃觀稼幸飛龍院幸開封府幸都亭
驛幸禮賢院幸茶庫染院幸河倉幸金鳳園皆一再

至焉太宗太平興國二年二月幸新鑿池賜後卒錢
布有差六月幸飛龍院是後凡四幸三年四月觀刈
麥九年正月六日幸景龍門外水磧帝臨水而坐召
從臣觀之因謂曰此水出於山源清澄甘潔近河之
地水味皆甘豈河潤所及乎宋琪等曰亦猶人性善
惡染習致然帝曰卿言是也四月幸金明池習水戰
帝御水殿召近臣觀之謂宰相曰水戰南方之事也
今其地已定不復施用時習之示不忘戰耳因幸講
武臺閱諸軍都試軍中之絕技者遞加賜賚遂登瓊
林苑樓陳百戲擲金錢令樂人爭之極歡而罷五月

二日出南薰門觀稼召從官列坐田中令民刈麥咸
賜以錢帛回幸玉津園觀漁張樂習射既宴而歸明
年五月幸城南觀麥賜田夫布帛有差雍熙四年四
月幸金明池觀水嬉賜從官飲帝曰雨霽天涼中外
無事宜勿惜醉因登苑中樓盡歡而罷淳化三年三
月幸金明池命為競渡之戲擲銀甌於波間令人汨
波取之因御船奏教坊樂岸上都人縱觀者萬計帝
顧視高年皓首者就賜白金器皿九月幸潛龍園駐
輦池東岸臨水謂近臣曰朕不至此已十年昔尹京
日無事常痛飲池上今池邊之木已成林矣因顧教

坊使郭守忠等數人曰汝等前日以樂童從我今亦
皓首光陰迅速如此嗟嘆久之帝親引滿舉白群臣
盡醉真宗咸平元年八月幸諸王宮二年九月幸開
寶寺福聖院是後二寺臨幸者凡十有四年五月
幸金明池觀水戲揚旗鳴鼓分左右翼植木繫綵以
爲標識方舟疾進先至者賜之移幸瓊林苑登露臺
鈞容直奏樂臺下百戲競集從臣皆醉自是凡四臨
幸九月幸大相國寺是後再幸者九幸上清宮者十
有二幸玉津園者十幸太一宮玉清昭應宮各六餘
不盡載大中祥符八年正月十九日中書門下上言

伏覩今月十四日皇帝詣諸宮寺焚香總三十餘處
過百拜以上臣等侍從倍增憂灼昨崇政殿已面奏
陳臣聞尊事萬靈固先精意登用百禮乃貴時中在
經久之從宜必裁正而惟允伏望特命攸司載詳定
式自今車駕幸諸宮觀寺院正殿再拜及諸殿令群
臣以下分拜庶垂億載允叶通規乃詔禮儀院詳定
差減焉仁宗景祐三年詔閣門詳定車駕幸宮觀寺
院支賜茶絹等第哲宗紹聖四年三月八日詔自今
遇車駕出新城令殿前馬步軍司取旨權差馬步軍
赴新城外四面巡檢下祇應每壁馬軍二百人步軍

三百年並於城外巡警

三元觀燈本起於方外之說自唐以後常於正月望夜開坊市門然燈宋因之上元前後各一日城中張燈大內正門結綵為山樓影燈起露臺教坊陳百戲天子先幸寺觀行香遂御樓或御東華門及東西角樓飲從臣四夷蕃客各依本國歌舞列於樓下東華左右掖門東西角樓城門大道大宮觀寺院悉起山棚張樂陳燈皇城雉堞亦徧設之其夕開舊城門達旦縱士民觀後增至十七十八夜太祖建隆二年上元節御明德門樓觀燈召宰相樞密宣徽三司使端

明翰林樞密直學士兩省五品以上官見任前任節
度觀察使飲宴江南吳越朝貢使預焉四夷蕃客列
坐樓下賜酒食勞之夜分而罷三年正月十三夜然
燈罷內前排場戲樂以昭憲皇太后喪制故也太平
興國二年七月中元節御東角樓觀燈賜從官宴飲
五年十月下元節依中元例張燈三夜雍熙五年上
元節不觀燈躬耕籍田故也後凡遇用兵及災變諸
臣之喪皆罷真宗景德元年正月十四日賜大食三
佛齊蒲端諸國進奉使緡錢令觀燈宴飲大中祥符
元年十一月二十五日詔天慶節聽京城燃燈一晝

夜六年四月十六日先天降聖節亦如之天聖二年六月罷降聖節然燈政和三年正月詔放燈五日五年十二月二十九日詔景龍門預爲元夕之具實欲觀民風察時態黼飾太平增光樂國非徒以遊豫爲事特賜公師宰執以下宴及御製詩四韻賜太師蔡京六年正月七日御筆今歲閏餘候晚猶未春和晷短氣寒於宴集無舒緩之樂景靈宮朝獻移十四日東宮十五日西宮畢詣上清諸祥宮燒香十六日詣醴泉觀等處燒香上元節移於閏正月十四日爲始宣和六年十二月二十四日賜太師蔡京以下應兩

府赴睿謨殿宴景龍門觀燈續有旨宣太傅王黼赴宴七年正月十八日宴輔臣觀燈

賜酺自秦始秦法三人以上會飲則罰金故因事賜酺吏民會飲過則禁之唐嘗一再舉行太宗雍熙元年十二月詔曰王者賜酺推恩與衆共樂所以表升平之盛事契億兆之歡心累朝以來此事久廢蓋逢多故莫舉舊章今四海混同萬民康泰嚴禋始畢慶澤均行宜令士庶之情共慶休明之運可賜酺三日二十一日御丹鳳樓觀酺召侍臣賜飲自樓前至朱雀門張樂作山車旱船往來御道又集開封府諸縣及

諸軍樂人列於御街音樂雜發觀者溢道縱士庶遊觀遷市肆百貨於道之左右召畿甸耆老列坐樓下賜之酒食明日賜群臣宴於尚書省仍作詩以賜明日又宴群臣獻歌詩賦頌者數十人真宗景德三年九月詔許群臣士庶選勝宴樂御史臺皇城司毋得糾察四年二月甲申上御五鳳樓觀酺宗室近臣侍坐樓前露臺奏教坊樂召父老五百人列坐賜飲於樓下後二日上復御樓賜宗室文武百官宴於都亭驛賜諸班諸軍將校羊酒大中祥符元年正月詔應致仕官並令赴都亭驛酺宴御樓日合預坐者亦聽

又詔朝臣已辭未見並聽赴會凡賜酺命內諸司使
三人主其事於乾元樓前露臺上設教坊樂又駢繫
方車四十乘上起綵樓者二分載鈞容直開封復爲
棚車二十四每十二乘爲之皆駕以牛被以錦繡紫
以綵絹分載諸軍京畿伎樂又於中衢編木爲欄處
之徙坊市邸肆對列御道百貨駢布競以綵幄鏤版
爲飾上御乾元門召京邑父老分番列坐樓下傳旨
問安否賜以衣服茶帛若五日則第一日近臣侍坐
特召丞郎給諫上舉觴教坊樂作二大車自昇平橋
而北又有旱船四挾之以進輞車由東西街交鷺並

往復日再焉東距望春門西連闔闔門百戲競作歌
吹騰沸宗室親王近列牧伯洎舊臣宗室官為設綵
棚於左右廊廡士庶縱觀車騎填溢歡呼震動第二
日宴群臣百官於都亭驛宗室於親王宮第三日宴
宗室內職於都亭驛近臣於宰相第第四日宴百官
於都亭驛宗室於外苑第五日復宴宗室內職於都
亭驛近臣於外苑上多作詩賜令屬和及別為勸酒
詩禁軍將校日會於殿前馬步軍之廄是歲東封泰山
所過州府上御子城門樓設山車綠船載樂從臣
侍坐本州父老進奉使蕃客悉預兗州駐蹕仍賜群

臣會於延壽寺所在改賜門名兗州曰圓鑾覃慶鄆
州曰升中延福濮州曰告成延慶澶州以行宮迫隘
當衢結綵爲殿名曰延禧幸汾陰亳州皆如東封路
河中府門名曰詔畢宣恩陝州曰霈澤惠民鄭州曰
回鑾慶賜西京將議改五鳳樓名上曰此太祖所建
因瑞應不可更也華陰就行宮宴父老賜驛亭名曰
宣澤至鄭州以太宗忌日甫過罷會賜與如例亳州
曰奉元均慶南京曰重熙頌慶天禧五年以畿縣追
集老人疲勞之故止召兩赤縣坊縣父老預會其不
預名亦聽給以賜物天下賜酺各令州府會官屬父

老邊州或遣中使就賜又詔開封府賜酺日罪人酗酒而不傷人者咸釋之再犯論如法後賜酺皆准此宋之繁庶於斯為盛後遂為定制云

志卷第六十六

志卷第六十七

宋史一百十四

開府儀同三司上柱國錄軍國重事前中書右丞相監修國史領經筵事都總裁民脫等奉

勅修

禮十七 嘉礼五

巡幸

賜進士宴

養老

視學儀

幸祕書省

進書儀

大射儀
鄉飲酒礼

巡幸之制唐開元禮有告至肆觀考制度之儀開宝通禮因之太祖幸西京所過賜夏秋田租之半真宗朝諸陵及奉大礼塗中皆服折上巾窄袍出京過京城服鞚袍具鸞駕群臣公服繫鞬供奉班及內朝官

前導凡從官並日赴行宮合班起居晚朝視事群臣不赴中頓侍食百官就宿頓迎駕訖先發或道塗隘遠則免迎駕將進發近臣諸軍賜裝錢出京留司馬步諸軍夾道左至新城門外奉辭留守辭於門內百官父老辭於苑前召留守等賜飲苑中州縣長吏留司官待于境所過賜巡警兵守津梁行郵治道卒時服錢復父老綾袍茶帛金中賜衛士縉錢所幸寺觀賜道釋茶帛或加紫衣師號吏民有以饗餼酒果方物獻者計直答之命官籍所過繫囚逋負者日引對多原釋仍採訪民間疾苦振恤鰥寡孤獨車服度量

權衡有不如法則舉儀制禁之有竒材異德及政事
尤異者孝子順孫義夫節婦為鄉里所稱者其不守
廉隅昧於正理者並條析以聞官吏知民間疾苦者
亦許錄奏所過州府結綵為樓陳音樂百戲道釋以
威儀奉迎者悉有賜東京留守遣官表請還京優詔
答之駕還京大陳兵衛以入凡行幸太祖太宗不常
其數自咸平中車駕每出金吾將軍帥士二百人執
輶周遼謂之禁園春夏緋衣秋冬紫衣郊祀省方並
增二百服錦襖出京師則加執劒親王中書樞密宣
徽行園內餘官園外大禮備儀衛則有司先布土爲

黃道自宮至祀所左右設香臺畫幕青繩闌干

巡省在金

則不設凡巡省翰林進號傳詩付樞密院每夕摘字令

衛士相應爲識東京舊城城門西京皇城司並契勘
內外城宮廟門並勘箭出入皆然入藩鎮外城子城
門亦勘箭朝陵定扈從官人數入栢城者僕射以上
三人丞郎以上二人餘各一人東封定仗內導駕官
從人數親王中書樞密宣徽三司使四人學士尚書
丞郎節度使三人大兩省大卿監三司副使樞密承
旨客省閣門使副金吾大將軍押仗鳴珂內殿崇班
以上二人餘各一人命諸司巡察之自後舉大禮皆

循此制建炎元年七月詔曰祖宗都汴垂二百年比
年以來圖慮弗臧禍生所忽肆朕纂承顧瞻宮室何
以爲懷是用權時之宜法古巡狩駐蹕近甸號召軍
馬朕將親督六師以援京城及河北河東諸路與之
決戰歸宅故都迎還二聖以稱朕夙夜憂勤之意十
月一日車駕登舟巡幸淮甸宰執侍從百司三衙禁
旅五軍將佐扈衛以行駐蹕揚州三年幸杭州自杭
州幸江寧府尋幸浙西自浙西幸浙東乃下詔曰國
家遭金人侵逼無歲無兵朕纂承以來深軫念慮謂
父兄在難而吾民未撫不欲使之陷於鋒鏑故包羞

忍耻爲退避之謀冀其逞志而歸稍得休息自南京移淮甸自淮甸移建康而會稽播遷之遠極于海隅卑詞厚禮使介相望以至願去尊稱甘心貶屈請用正朔比於藩臣遣使哀祈無不曲盡假使金石無情亦當少動累年卑屈卒未見從生民嗷嗷何時寧息今諸路之兵聚於江浙之間朕不憚親行擾其要害如金人尚容朕爲汝兵民之主則朕於事大之禮敢有不恭或必用兵窺我行在傾我宗社金炭生靈竭取東西金帛子女則朕亦何愛一身不臨行陣以踐前言以保群生朕已取十一月二十五日移蹕前去

浙西爲迎敵計惟我將士人民念國家涵養之恩二
聖拘縻之辱悼殺戮焚殘之禍與其束手待斃曷若
弁計合謀同心戮力奮勵而前以存家國乃詔御前
應奉官司自合扈從外內太常寺據實用入數扈從
餘接續起發四年正月次台州二月次溫州三月幸
浙西紹興元年詔移蹕臨安府六年詔周視軍師車
駕進發遣官奏告天地社稷宗廟自臨安幸平江尋
幸建康八年二月還臨安三十一年九月詔金人背
盟失信今率精兵百萬躬行天討用十二月十日車
駕進發應行宮臨安府文武百僚城北奉辭其日應

文武百僚先詣城北幕次俟車駕御舟將至御史臺
閣門太常寺分引文武百僚立班定兩拜訖俟御舟
過班退三十二年正月詔視師江上北騎遁去兩淮
無警已委重臣統護諸將經畫進討今暫還臨安畢
恭文祔廟之禮宜令有司增脩建康百官吏舍諸軍
營砦以備往來巡幸可擇日進發車駕還宮

養老於太學皇帝服通天冠絳紗袍乘金輶至太學
酌獻文宣王三祭酒再拜歸御幄比車駕初出量時刻
遣使迎三老五更於其第三老五更俱服朝服乘安車
導從至太學就次國老庶老有司預戒之各服朝服集

於其次大樂正帥工人二舞入立於庭東上閣門御
史臺太常寺客省四方館自下分引百官宗室客使
學生等以次入就位如視學班太常博士贊三老五
更俱出次引國老庶老立於後重行異位禮直官通
事舍人引左輔奏請中嚴少頃又奏外辦皇帝出大
次侍衛如常儀大樂正令撞黃鐘之鐘右五鐘皆應
協律郎跪俛伏舉麾輿宮架乾安之樂作皇帝即御
坐樂止典儀曰再拜在位官皆再拜三老五更杖而
入各左右二人夾扶太常博士前引史臣執筆以從
三老五更入門宮架和安之樂作至宮架北北向立

以東為上奉禮郎引群老隨入位於其後樂止博士
揖進三老在前五更在後仍杖夾扶宮架和安之樂
作至西階下樂止博士揖三老五更自西階升堂國
老庶老立堂下三老五更當御坐揖群老亦揖皇帝
為興次奉禮郎揖國老升堂博士引三老五更奉禮
郎引國老以下各於席後立典儀贊各就坐贊者承
傳宮架尊安之樂作三老五更就坐三公授几九卿
正履訖殿中監尚食奉御進珍羞及黍稷等先詣御
坐前進呈遂設於三老前樂止尚食奉御詣三老坐
前執爵而饋訖尚醞奉御詣酒尊所取爵酌酒奉御

執爵奉於三老次太官良醞令以次進珍羞酒食於五更群老之前皆食大樂正引工人升登歌奏惠安之樂三終史臣旣錄三老所論善言善行宮架作申安之樂憲言成福之舞畢文舞退作受成告功之舞畢三老以下降筵博士引三老五更於堂下當御坐前奉禮郎引群老復位俱揖皇帝為興三老五更階至堂下宮架和安之樂作出門樂止禮直官通事舍人引左輔前奏禮畢退復位典儀贊拜訖皇帝降坐太常卿道還大次百僚以次退車駕還宮三老五更升安車導從還翼日詣闕表謝

視學哲宗始視學遂幸國子監詣至聖文宣王殿行
釋奠禮一獻再拜御敦化堂召從官賜坐禮部太常
寺本監官承事郎以上侍立承務郎以下三學生坐
于東西廡侍講吳安詩執經祭酒豐稷講尚書無逸
終篇復命宰臣以下至三學生坐賜茶豐稷賜三品
服本監官學官等賜帛有差遂幸昭烈武成王廟酌
獻肅揖徽宗幸太學遂幸辟雍奠獻如上儀詔司業
吳絅等轉官改秩循資賜章服文武學生授官免省
試文解賜帛有差所司預設次於敦化堂後又於堂
上稍北當中兩間設次南向設御坐又設從官及講

筵講書執經官并太學官坐御坐之南東西重行異位太學生坐於兩廡相向並北上宰臣以下從官之次設於中門外皇帝酌獻文宣王畢幸太學降輦入次簾垂更衣禮直官通事舍人引講官與侍立官入就堂下皆繫鞶講書執經官學生各立堂下東西相向俟報班齊皇帝升坐班首奏萬福在位者皆應喏訖閣門使承旨臨階宣升堂通事舍人喝拜應在位者再拜訖分左右升堂各就位少立起居卽舍人分左右侍立禮直官通事舍人引講書及執經官就比向位班首奏萬福閣門使宣升堂舍人喝再拜訖分

東西升堂立於御坐左右講書官在西東向執經官
在東西向學生就北向位舍人喝拜在位者皆再拜
立於東西兩廡內侍進書案以經授執經官稍前進
於案上舍人喝拜就坐宰臣以下並堂上坐如閣門
所進坐位圖講書畢通事舍人曰可起群臣皆起降
階立執經官降講書官於御坐前致辭訖亦降舍人
喝拜如有宣答即再喝拜閣門宣坐賜茶舍人喝拜
訖宰臣以下升堂各立於位後學生各就北向位舍
人喝拜在位者俱拜訖各分東西廡以北為上下舍人
喝就坐上下皆就坐賜茶畢禮直官通事舍人引堂

上官降階就位舍人喝拜在位者俱拜訖禮直官引
之以次出學生就位舍人喝拜學生俱再拜退紹興
十三年七月國學大成殿告成奉安廟像明年二月
國子司業高閱請幸學上從之詔略曰偃革息民恢
儒建學聲明丕闡輪奐一新請旣方堅理宜從欲將
欽謁於先聖仍備舉於舊章三月上服韞袍乘輦入
監止輦于大成殿門外入幄群臣列班於庭帝出幄
升東階跪上香執爵三祭酒再拜群臣皆再拜上降
入幄分奠從祀如常儀尚舍先設次於崇化堂之後
及堂上之中南向設御坐閣門設群臣班於堂下如

月朔視朝之儀宰輔從臣次於中門之外上乘輦幸
太學降輦於堂入次更衣講官入就堂下講位北向
執經官學生皆立於堂下東西相向帝出次升御坐
群臣起居如儀乃命三公宰輔以下升堂皆就位左
右史侍立講書及執經官北面起居再拜皆命之升
立於御坐左右學生北面再拜分立兩廡北上內侍
進書案牙籤以經授執經官賜三公宰輔以下坐講
畢群臣皆起降階東西相向立執經官降講官進前
致詞乃降北面再拜左右史降乃賜茶三公以下北
面再拜升各立於位後學生北面再拜分兩廡立上

下就坐賜茶畢三公以下降階學生自兩廡降皆址
面再拜群臣以次出上降坐還次乘輦還宮時命禮
部侍郎秦煒執經司業高閎講易之泰遂幸養正持
志二齋賜閱三品服學官迂秩諸生授官免牽賜帛
有差上旣奠拜注視貌象翼翼欽慕覽唐明皇及太
祖真宗徽宗所製贊文命有司悉取從祀諸贊皆錄
以進帝逐作先聖及七十二子贊冠以序文親灑翰
墨以方載之五月丙辰登之綵殿備儀衛作樂命監
學之臣自行宮北門迎置學宮揭之大成殿上及二
廡序曰朕自睦鄰息兵首開學校教養多士以遂忠

良繼幸太學延見諸生濟濟在庭意甚嘉之因作文
宣王贊機政餘間歷取顏面而下七十二人亦為製
贊用廣列聖崇儒右文之声復知師弟子間纓弁森
森覃精繹思之訓其於世道人心庶幾焉二十六年十
二月言者謂陛下崇儒重道製為贊辭刻宸翰于琬
琰光昭往古寰宇儒紳孰不顧瞻雲漢之章請奉石
刻于國子監以碑本徧賜郡學從之淳熙四年孝宗
幸太學如紹興之儀命禮部侍郎李燾執經祭酒林
光朝講太學尋幸武學如太學之儀帝肅揖武成王不拜嘉泰三年正月寧宗幸太學如淳熙之儀淳祐元年正月

理宗幸太學宗武兩學官屬生員並赴太學陪位候
車駕至學詣先聖文宣王位三上香執爵三祭酒俛
伏興再拜在位官皆再拜皇帝至崇化堂宰臣使相
執政並起居執經官由東階講官由西階並升堂於
御前分東西相向立次引國子監三學學官學生一
班北面再拜贊各就坐賜茶俟講書畢起立班再拜
禮成執經官講書官國子監三學官生員各推恩轉
官有差咸淳三年正月戊辰度宗幸太學祗謁禮部
尚書陳宗禮執經國子祭酒雷宜中講中庸餘並如

儀

賜貢士宴名曰聞喜宴政和新儀押宴官以下及釋
褐貢士班首初入門正安之樂作至庭中望闕位立
樂止預宴官就位再拜訖押宴官西向立中使宣曰
有敕在位者皆再拜訖中使宣曰賜卿等聞喜宴在
位者皆再拜搢笏舞蹈又再拜次引押宴官稍前謝
坐再拜在位者皆再拜若賜敕書即引貢士班首稍
前中使宣曰有敕貢士再拜中使宣曰賜卿等敕書
班首稍前搢笏跪中使授敕書訖少退班首以敕書
加笏上俛伏興歸位再拜在位者皆再拜凡預宴官
分東西升階就坐貢士以齒酒初行賓興賢能之樂

作飲訖食畢樂止酒再行於樂辟離之樂作酒三行
樂育人材之樂作酒四行樂且有儀之樂作酒五行
正安之樂作再坐酒行樂作節次如上儀皆飲訖食
畢樂止押宴官以下俱興就次賜花有差少頃戴花
畢次引押宴官以下并釋褐貢士詣庭中望闕位立
謝花再拜復升就坐酒行樂作飲訖食畢樂止酒四
行訖退次日預宴官及釋褐貢士入謝如常儀寧宗
慶元五年五月賜新及第進士魯從龍以下聞喜宴
于禮部貢院上賜七言四韻詩祕書監楊王休以下
繼和以進自後每舉並如之

幸祕書省紹興十四年七月新建祕書省成祕書少
監游操等援宣和故事請車駕臨幸詔從之二十七
日幸祕書省至右文殿降輦放手詔曰蓋聞周建外
史掌三皇五帝之書漢選諸儒定九流七畧之奏文
德之盛後世推焉仰惟祖宗建開元府凡累朝名世
之士由是以興而一代致治之原蓋出於此朕嘉與
學士大夫共宏斯道迺一新史觀新御榜題肆從望
幸之忱以示右文之意嗚呼士習爲空言而不爲有
用之學久矣爾其勉脩術業益勵猷爲一德一心以
共赴亨嘉之會用丕承我祖宗之大訓顧不善歟遂

陳累朝御書御製晉唐書畫三代古器次宣皇太子
宰臣以下觀訖退遂賜宴于右文殿酒五行群臣再
拜退車駕還內賜少監游操三品服御書扇餘官筆
墨館閣官各轉一官淳熙五年九月十三日孝宗幸
祕書省如紹興十四年之儀帝賦詩群臣皆屬和
進書儀紹興二十年五月八日進呈中興聖綱太常
博士丁屢明言乞比附進呈玉牒行禮二十四年進
呈徽宗御集禮部言昨紹興十年徽宗御製擬以敷
文名閣今乞權安奉於天章閣續俟崇建二十六年
十月進呈太后回鑾事實二十七年三月宰臣沈該

言玉牒所官陳康伯等先次編脩太祖皇帝玉牒自
誕聖至即位自建隆元年至開寶九年通脩一十七
年開基玉牒舊制以梅紅羅面簽金字今欲題曰皇
宋太祖皇帝玉牒又編脩今上皇帝玉牒自誕聖之
後聖德祥瑞建大元帥府事蹟至即帝位二十餘年
又自即位後編脩至紹興二年通脩二十六年中興
玉牒今欲題曰皇宋今上皇帝玉牒宣祖太祖太宗
魏王下各宗仙源類譜五世昭穆今已脩寫進本乞
擇日進呈詔從其請前期儀查司臨安府於玉牒殿
上南向設權安奉玉牒類譜并中興聖統幄次又於

玉牒所向外設騎從官及文武百官等待班幕次又
於景靈宮內外設騎從官幕次進呈前一日俟朝退
玉牒所提領官都大提舉諸司官承受官玉牒所官
等赴本所幕次宿衛俟儀仗樂人等排立御史臺閣
門太常寺分引玉牒所官詣玉牒殿下北向立禮直
官引提領官詣玉牒殿下北向立禮直官揖躬拜提
領官拜在位官皆再拜訖次引提領官詣香案前搢
笏三上香執笏退復位皆再拜訖班退歸幕次宿衛
儀仗樂人作樂晝夜更互排立其日五更御史臺閣
門太常寺分引提領官宰執使相侍從臺諫兩省官

知閣禮官南班宗室詣玉牒殿北向立禮直官揖躬
拜提領官拜在位官皆再拜訖次引提領官詣玉牒
類譜香案前搢笏三上香執笏退復位禮直官引提
領官詣幄前西向立次騎從官分左右乘馬俟玉牒
所率輦官奉擎玉牒類譜腰輿進行樂人作樂儀衛
儀仗迎引次引提領官宰執使相侍從臺諫兩省官
知閣禮官南班宗室騎從至和寧門下馬執笏步從
玉牒類譜至垂拱殿門外幄次步從官權歸幕次樂
止儀衛樂人等並於幄次前排立俟進呈玉牒類譜
並如閣門儀訖俟玉牒類譜出殿門御史臺閣門太

常寺分引提領官宰熟使相侍從臺諫兩省官知閣
禮官南班宗室分左右執笏步從儀衛樂人前引迎
奉出皇城北宮門步從等官上馬騎從至和寧門外
前引將至玉牒所御史臺閤門太常寺分引文武百
官於玉牒所門內殿門外立班內文臣釐務通直郎
以上及承務郎見任寺監主簿執事官以上武臣脩
武郎以上迎拜訖如值雨地下沾濕迎拜官吏不迎
拜騎從官至玉牒所並下馬執笏步從詣玉牒殿下
分東西相向立禮直官引提領官詣玉牒類譜幄前
西向立定俟玉牒所率輦官奉擎玉牒類譜入幄儀

仗儀衛輦官樂人更互排立提領官宰執使相侍從
臺諫兩省官知閣禮官南班宗室及玉牒所官分官
赴景靈宮迎奉皇帝中興聖統赴玉牒殿同時安奉
俟安奉時將至設香案畢次御史臺閣門太常寺分
引文武百官詣玉牒殿並北向立班定禮直官引
提領官詣幄前西立俟日官報時及次玉牒所安奉
玉牒類譜訖次引提領官復位北向立定禮直官揖
躬拜提領官拜在位官皆再拜訖禮直官引提領官
詣香案前擲笏三上香執笏退復位立定在位皆再
拜訖退儀衛樂人等以次退自是凡進書並倣此惟

進太上皇聖政則有詣德壽宮之儀淳祐五年二月
十二日進孝宗光宗兩朝御集寧宗實錄及理宗玉
牒日曆其日皇帝御垂拱殿提舉官禮儀使宗室使
相宰執以下赴實錄院右文殿玉牒所經武閣並行
燒香禮畢奉迎諸書至和寧門步導至垂拱殿以俟
班齊各隨腰輿入殿下東西向立皇帝服鞚袍出宮
殿下鳴鞭禁衛諸班直親從等弁入內省執骨朵使
臣國史實錄院日曆所編脩經武要畧所玉牒所點
檢文字以下弁腰輿下人並迎駕自贊常起居內擎
人不拜應喏皇帝即御坐先知閣門官以下各班起居如

常儀次日內官下殿各取合進呈書匣升殿於殿上
東壁各置案上以南爲上知閣門官二員自御坐前
導皇帝起詣三朝諸書香案前祿位東向立閣門提
點奏請上香三上香訖又奏請皇帝再拜訖知閣門
官前導皇帝復歸御坐知閣門官歸東朵殿上侍立
儀鑾司徹香案并祿降東朵
殿次舍人請國史實錄院以下提舉官禮儀使宰執
弁進讀官升殿於御坐東面西立國史實錄院國史
要畧所玉牒所
官殿下依舊立俟入內官進御案孝宗御集提舉官
弁進讀御集官稍前立分進讀御集官於御前過西
壁面東立御集提舉諸司官於孝宗御集匣前摺笏

啟封開鑰訖出笏歸侍立位御集承受官搢笏於御
集匣內取冊轉授提舉官搢笏接訖承受出笏提舉
官奉冊置御案上出笏皇帝起前立提舉諸司官承
受官分東西相向立並搢笏揭冊訖各出笏進讀御
集官搢笏稍前取箋子指讀逐版揭冊指讀並如上儀俟進讀畢
皇帝復坐進讀御集官置箋子於御案上出笏却於
御前東壁面西立以俟提舉官搢笏收冊復授承受
官搢笏接訖提舉官出笏稍後立承受官奉冊入匣訖出笏歸侍立位次讀光宗御集寧宗實錄光宗經武
要略並同上儀次玉牒提舉官并進讀玉牒官稍前

立分進讀玉牒官於御前過西壁面東立玉牒提舉
諸司官於玉牒匣前擧笏啓封鑰訖出笏歸侍立位
玉牒承受官擧笏取冊授提舉官置御案上進讀亦
如前儀讀畢鎖匣出笏歸侍立位次日曆提舉官并
進讀日曆官啓封鑰進讀亦同俱畢入內官撤案承
官奉冊入匣訖出笏提舉諸司官擧笏鑰匣奉書匣
訖出笏歸侍立位儀鸞司微卓子降東朵殿奉書匣

兩拜訖贊各祗候直身立宣答御藥下殿宣答提舉
官禮儀使並歛身聽宣答訖御藥升殿揖躬身贊拜兩拜
訖贊各祗候直身立舍人引赴東壁面西立次引國
史實錄院日曆所編脩經武要略所玉牒所官一班
首直身出班歛身稱謝訖歸位立揖躬身贊拜兩拜
訖贊各祗候直身立如傳旨謝恩知閣門官承旨訖
於折檻東面西立傳與舍人承旨訖再揖躬身贊謝
恩拜兩拜訖贊各祗候直身立不該賜茶
官先退次引國史
實錄院日曆所編脩經武要略所玉牒所提舉諸司
官弁承受官以下一班當殿面北立定揖躬身贊謝

恩拜兩拜訖贊各祗候直身立各歸位立次引國史
實錄院日曆所編脩經武要略所玉牒所點檢文字
以下一班當殿面北立定揖躬身贊謝恩拜兩拜訖
贊各祗候直身立各歸位立傳旨宣坐賜茶訖舍人奏
閣門無公事皇帝起還宮百官導送奏安兩朝御集
實錄於天章閣經武要略於經武閣玉牒於玉牒所
日曆於秘閣如儀

大射之禮廢於五季太宗始命有司草定儀注其群
臣朝謁如元會酒三行有司言請賜王公以下射侍
中稱制可皇帝改服武弁布七埒於殿下王公以次

射開樂縣東西廂設熊虎等侯陳賞物於東階以賚能者設豐爵於西階以罰否者并圖其冠冕儀式表著壇壝之位以進帝覽而嘉之謂宰臣曰俟弭兵當與卿等行之凡游幸池苑或命宗室武臣射每帝射中的從官再拜奉觴貢馬爲賀預射官中者帝爲之解賜襲衣金帶散馬不解則不賜苑中皆有射棚畫暈射則用招箭班三十人服緋紫繡衣帕首分立左右以唱中否節序賜宴則宗室禁軍大校牧伯諸司使副皆令習射遂為定制外國使入朝亦令帥臣伴賜射於園苑政和宴射儀皇帝御射殿侍宴官公

服繫韁射官窄衣奏聖躬萬福再拜升殿酒三行引
射官降皆執弓矢謝恩再拜三公以下在右射官在
左不射者依坐次分立皇帝初射中舍人贊拜凡左
右祇應臣僚除內侍外並階上下再拜行門禁衛諸
班親從諸司祇應人並自贊再拜招箭班殿上躬奏
訖跪進椀射官先傳弓箭與殿侍側立內侍接椀訖
就拜起降階再拜有司進御茶牀天武引進奉馬列
射梁前員僚奏聖躬萬福東上閤門官詣御前躬奏
班首姓名以下進酒班首以下橫行立贊再拜班首
奉酒進樂作飲畢殿上臣僚再拜舍人贊各賜酒群

官俱再拜贊各就坐群官皆立席後引進司官臨階
宣進奉出天武奉馬出樂合復贊就坐飲訖揖興諸
司收坐物等射官左側臨階取弓箭侍立皇帝再射
中的或雙中如上儀進酒臨時取自得自進酒更不
進奉中扁榦及解中更不賀不

進酒臨時取自得自進酒更不
進奉中扁榦及解中更不賀不

進臣僚射中引降階再拜訖殿下側立御箭解中招
箭班進擬如上儀舍人再引射中官當殿揖躬宣有
敕賜窄衣金帶跪受箱過再拜過殿側服所賜訖再
引當殿再拜更不射如宣再射或更賜箭令射如未
再射即就位再拜如再射中御箭

再解中賜鞍
轡馬如上儀臣僚射中御箭不解引降階再拜立招
箭班殿上躬奏訖下殿舍人宣有敕賜銀榦跪受執

挽并箭就拜起再拜如合賜散馬即同宣賜宣有敕
賜銀椀兼賜散馬若干匹射訖進御茶床諸司復陳
坐物等群官各立席後贊就坐群官俱坐酒五行宣
示鹹宣勸如儀皆作樂宴畢內侍舉御茶床三公以
下降階再拜退乾道二年二月四日車駕幸玉津園
皇帝射訖次命皇太子次慶王次恭王次管軍臣僚
等射如是者三每射四發帝前後四中的淳熙元年
九月車駕幸玉津園命從駕文武官行宴射之禮皇
太子宰執以下酒三行樂作皇帝臨軒有司進弓矢
皇帝中的皇太子進酒率宰執以下再拜稱賀宣皇

太子射射中賜宣預射臣僚射使相鄭藻起居舍人
王卿月環衛官簫奪里懶射中各賜襲衣金帶
鄉飲之禮有三周禮鄉大夫三年大比與賢者能者
鄉老及鄉大夫帥其吏與其衆寡以禮賓之一也黨
正國索鬼神而祭祀則禮屬民而飲酒于序以正齒
位二也州長春秋習射于序先行鄉飲禮三也後世
臘蜡百神春秋習射序賓飲酒之儀不行於郡國唯
貢士日設鹿鳴宴猶古者賓興賢能行鄉飲之遺禮
也然古禮有賓主僎介與今之禮不同罷以尊俎與
今之罷不同賓坐於西北介坐於西南主人坐東南

僕坐東北與今之位不同主人獻賓賓酢主人主人
酬賓次主人獻介介酢主人次主人獻衆賓與今之
儀不同今制州軍貢士之月以禮飲酒且以知州軍
事為主人學事司所在以提舉學事為主人其次本
州官八行上舍生當貢者與州之群老為衆賓亦古
者序賓養老之意也是月也會凡學之士及武士習
射亦古者習射于序之意也唐貞觀所放禮惟明州
獨存淳化中會例行之政和禮局定飲酒祭降之節
與舉酒作樂器用之屬並參用辟離宴貢士儀其有
古樂處令用古樂既又以河北轉運判官張孝純之

言周官以六藝教士必射而後行古者諸侯貢士天
子試諸射宮請詔諸路州郡每歲宴貢士於學因講
射禮於是禮官參定射儀鄉飲酒前一日本州於射
亭東西序量地之宜設提舉學事諸監司知州通判
州學教授應赴鄉飲酒官貢士幕次本州兵馬教諭
備弓矢應用物設樂其日初筵提舉學事知州軍通
判帥應赴鄉飲酒官貢士詣射亭執弓矢揖人射乘
矢若中則守帖者舉獲唱獲執筭者以筭投壺畢多
筭勝少筭射畢贊者贊揖酬酢如儀畢揖退飲如鄉
飲酒紹興七年郡守仇念置田以供費十三年比部

卽中林保乞脩定鄉飲儀制遍下郡國於是國子祭
酒高閣草具其儀上之僕介之位皆與古制不合諸
儒莫解其指意慶元中朱熹以儀禮改定知學者皆
尊用之主賓僕介之位始有定說其主則州以守縣
以令位于東南賓以里居年高及致仕者位于西北
僕則州以倅縣以丞或簿位東北介以次長位西南
三賓以賓之次者司正以衆所推服者相及贊以士
之熟於禮儀者其日質明主人率賓以下先釋菜于
先聖先師退各就次以俟肅賓介與衆賓既入主人
序賓祭酒再拜詣罍洗洗禪至酒尊所酌實禪授執事

者至賓席前跪以獻賓賓酬主人主人酬介介酬衆賓賓主以下各就席坐訖酒再行次沃洗贊者請司正揚觴致辭司正復位主人以下復坐主人興復至阼階楣下僕從賓介復至西階下立三賓至西階立並南向主人拜賓介以下再拜賓介與衆賓先自西趨出主人少立自東出賓以下立于庠門外之右東鄉主人立于門外之左西鄉僕從主人再拜賓介以下皆再拜退

卷之六十七

志卷第六十八

宋史一百十五

開寶寺上齋鑿龕畫前晝象觀國史領鑿事都總裁脫脫等奉

勅修

禮十八

嘉禮六

皇太子冠禮

主子附

公主笄禮

宗室附

親王納妃

品官婚禮

庶人婚禮

皇太子冠儀嘗行於大中祥符之八年徽宗親製冠禮沿革十一卷命儀禮局倣以編次其儀前期奏告天地宗廟社稷諸陵宮觀殿中監帥尚舍張設垂拱文德殿門之內設香案殿下螭陛間又為房於東角

殿大晟展宮架樂於橫街南太常設太子冠席東階
上東宮官位於後設褥位陳服於席南東領北上遠
遊冠簪導袞冕簪導同箱在服南設罍洗阼階東罍
在洗東篚在洗西實巾一加勺幕光祿設醴席西階
上南面實側尊在席南又設饌于席加幕執事者並
公服立罍洗酒饌之所九旒冕遠遊冠折上巾各一
匱奉禮郎三人執以侍於東階之東西北上設典儀
位於宮架東北贊者二人在南西向禮直官通事舍
人太常博士引太子詣祭殿東旁皇帝乘輦駐垂拱
殿百官起居如月朔視朝儀左輔版奏中嚴内外符

寶郎奉寶先出左輔奏外辦皇帝服通天冠絳紗袍
詣文德殿簾捲大樂正令撞黃鐘之鐘右五鐘皆應
殿上鳴鞭皇帝出西閣乘輦協律郎俛伏跪舉麾興
工鼓柷奏乾安之樂殿上扇合禮直官太常博士引
禮儀使導皇帝出降輦即坐簾捲扇開鞭鳴樂止燼
煙升符寶郎奉寶陳於御坐左右禮直官通事舍人
太常博士引掌冠贊冠者入門肅安之樂作至位樂
止典儀曰再拜在位者皆再拜左輔詣御坐前承制
降東階詣掌冠者前西向稱有制典儀贊在位官再
拜訖宣制曰皇太子冠命卿等行禮掌冠贊冠者再

拜訖文臣侍從官宗室武臣節度使以上升殿東西立應行禮官詣東階下立東宮官入詣太子東房次禮直官等引太子內侍二人夾侍東宮官後從欽安之樂作即席西向坐樂止引掌冠賛冠者以次詣壘洗樂作搢笏盥帨訖出笏升樂止執折上巾者升掌冠者降一等受之右執項左執前進皇太子席前北向立祝曰咨爾元子肇冠於阼筮日擇賓德成禮具於萬斯年承天之祜乃跪冠順安之樂作掌冠者興席南北面
立後準此贊冠者進席前北面跪正冠興立於掌冠者之後太子興內侍跪進服服訖樂止掌冠者揖太

子復坐禮直官等引掌冠者降詣壘洗如上儀贊冠者進席前北向跪脫折上巾置于匱興內侍跪受興置于席執遠遊冠者升掌冠者降二等受之右執項左執前進太子席前北向立祝曰爰即令辰申加元服崇學以讓三善皆得副予一人受天百福乃跪冠懿安之樂作掌冠者興贊冠者進跪簪結紩興太子興內侍跪進服服訖樂止掌冠者揖太子復坐掌冠者降詣壘洗及贊冠者跪脫遠遊冠並如上儀執袞冕者升掌冠者降三等受之右執項左執前進太子席前北向立祝曰三加彌尊國本以正無疆惟休有

室大競懋昭厥德保茲永命乃跪冠成安之樂作掌
冠者興贊冠者如上儀跪簪結紱內侍進服服訖樂
止禮直官寺引太子降自東階樂作由西階升卿醴席
南向坐樂止又引掌冠者詣壘洗樂作盥帨誥升西階
樂止贊冠者跪取爵內侍注酒掌冠者受爵跪進太
子席前北向立祝曰旨酒嘉薦有餌其香拜受祭之
以定爾祥令德壽豈日進無疆太子摺圭跪受爵正
安之樂作飲訖奠爵執圭大官令設饌席前太子摺
圭食訖樂止執圭興大官令徹饌爵禮直官等引自
西階詣東房易朝服降立橫街南北向東宮官復位
西向太子初行樂止禮直官等引掌冠贊冠者詣前西

向掌冠者少進字之曰始生而名為實之賓既冠而
字以益厥文永受保之奉天之慶奉敕字某太常博
士請再拜太子再拜訖擗笏舞蹈再拜奏聖躬萬福
又再拜左輔承旨降自東階詣太子前西向宣曰有
敕太子再拜宣敕曰事親以孝接下以仁遠佞近義
祿賢使能古訓是式大猷是經宣訖太子再拜訖禮
直官等引太子前俛伏跪奏稱臣雖不敏敢不祇奉
奏訖興復位再拜訖引出殿門樂作出門樂止侍立
官並降復位典儀曰拜贊者奉傳在位者皆再拜
禮儀使奏禮畢鳴鞭大樂正令撞鞶賓之鐘左五

鐘皆應乾安之樂作皇帝降坐左輔奏解嚴放仗在位官皆再拜退太子入內朝見皇后如宮中儀迺擇日謁太廟別廟宿齋於本宮質明服遠遊冠朱明衣乘金輅至廟改服袞冕執圭行禮群臣稱賀皇帝賜酒三行

皇子冠前期擇日奏告景靈宮太常設皇子冠席文德殿東階上稍北東向設褥席陳服于席南東領北上九旒冕服七梁進賢冠服折上巾公服七梁冠簪導九旒冕簪導同箱在服南設罍洗酒饌旒冕冠巾及執事者並如皇太子儀其日質明皇帝通天冠絳

紗袍御文德殿皇子自東房出內侍二人夾侍王府
官從恭安之樂作即席南向坐樂止掌冠者進折上
巾北向跪冠脩安之樂作贊冠者進北面跪正冠皇
子興內侍跪進服訖樂止掌冠者揖皇子復坐以爵
跪進祝曰酒禮和旨邊豆靜嘉授爾元服兄弟具來
永言保之降福孔皆皇子搢笏跪受爵翼安之樂作
飲訖太官令進饌訖再加七梁冠進安安之樂作掌冠
者進爵祝曰賓賛既成者核惟旅申加厥服禮儀有
序允觀爾成承天之祐皇子跪受爵輔安之樂作太
官奉饌三加九旒冕廣安之樂作掌冠者進爵祝曰

旨酒嘉栗甘薦令芳三加爾服眉壽無疆永承天休
俾熾而昌皇子跪受爵賢安之樂作太官奉饌饌徹
皇子降易朝服立橫階南北向位掌冠者字之曰歲
日云吉威儀孔時昭告厥字君子攸宜順爾成德永
受保之奉敕字某皇子再拜舞蹈又再拜奏聖躬萬
福又再拜左輔宣敕戒曰好禮樂善服儒講藝蕃我
王室友于兄弟不溢不驕惟以守之皇子再拜進前
俛伏跪稱臣雖不敏敢不祇奉俛伏興復位再拜出
殿上侍立官並降復位再拜放仗明日百僚詣東上

閣門賀

公主笄禮年十五雖未議下嫁亦笄笄之日設香案
於殿庭設冠席於東房外坐東向西設醴席於西階
上坐西向東設席位於冠席南西向其裙背大袖長
裙渝翟之衣各設於椸陳于庭冠笄冠朶九翬四鳳
冠各置于槃蒙以帕首飾隨之陳于服椸之南執事
者三人掌之櫛總置于東房內執事官嬪盛服旁立
俟樂作奏請皇帝升御坐樂止提舉官奏曰公主行
笄禮樂作贊者引公主入東房次行尊者為之總唇
畢出即席西向坐次引掌冠者東房西向立執事奉
冠笄以進掌冠者進前一步受之進公主席前北向

立樂止祝曰令月吉日始加元服棄爾幼志順爾成德壽考綿鴻以介景福祝畢樂作東向冠之冠畢席南北向立贊冠者為之正冠施首飾畢揖公主適房樂止執事者奉裙背入服畢樂作公主就醴席掌冠者揖公主坐贊冠者執酒器執事者酌酒授於掌冠者執酒止向立樂止祝曰酒醴和旨邉豆靜嘉受爾元服兄弟具來與國同休降福孔皆祝畢樂作進酒公主飲畢贊冠者受酒器執事者奉饌食訖撤饌復引公主至冠席坐樂止贊冠者至席前贊冠者脫冠置于槃執事者撤去樂作執事者奉冠以進掌冠者

進前二步受之進公主席前北向立樂止祝曰吉月
令辰乃申爾服飾以威儀淑謹爾德眉壽永年享受
遐福祝畢樂作東向冠之冠畢席南北向立贊冠者
為之正冠施首飾畢揖公主適旁樂止執事奉大袖
長裙入服畢樂作公主至醴席掌冠者揖公主坐贊
冠者執酒器執事者酌酒授于掌冠者執酒北向立
樂止祝曰賓贊既戒散核惟旅申加爾服禮儀有序
允觀爾成永天之祐祝畢樂作進酒公主飲畢贊冠
者受酒器執事者奉饌食訖撤饌復引公主至冠席
坐樂作贊冠者至席前贊冠者脫冠置于槃執事者

徹去樂作執事奉九翬四鳳冠以進掌冠者進前三
步受之進公主席前向北而立樂止祝曰以歲之吉
以月之令三加爾服保茲永命以終厥德受天之慶
祝畢樂作東向冠之冠畢席南北向立贊冠者為之
正冠施首飾畢揖公主適房樂止執事者奉渝翟之
衣入服畢樂作公主至醴席掌冠者揖公主坐贊冠
者執酒器執事者酌酒授于掌冠者執酒北向立樂
止祝曰旨酒嘉薦有懿其香咸加爾服眉壽無疆永
承天休俾熾而昌祝畢樂作進酒公主飲畢贊冠者
受酒器執事者奉饌食訖徹饌復引公主至席位立

樂止掌冠者詣前相對致辭曰歲日具吉威儀孔時
昭告厥字令德攸宜表爾淑美永保受之可字曰某
辭訖樂作掌冠者退引公主至君父之前樂止再拜
起居謝恩再拜少俟提舉進御坐前承旨訖公主再
拜提舉乃宣訓辭曰事親以孝接下以慈和柔正順
恭儉謙儀不溢不驕母詖母欺古訓是式爾其守之
宣訖公主再拜前奏曰兒雖不敏敢不祇承歸位再
拜見后母之禮如之禮畢公主復坐皇后稱賀次妃
嬪稱賀次掌冠贊冠者謝恩次提舉衆內臣稱賀其
餘班次稱賀並依常式禮畢樂作駕輿樂止

公主下降初被選尚者即拜駙馬都尉賜玉帶襲衣銀鞍勒馬采羅百匹謂之繫親又賜辦財銀萬兩進財之數倍於親王聘禮出降賜甲第餘如諸王夫人之制掌扇加四引障花燭籠各加十皆行舅姑之禮諸親遞加賜賚其縣主繫親以金帶賜辦財銀五千兩納財賜賚大率三分減其二宗室女特封郡君者又差降焉嘉祐初禮官言禮閣新儀公主出降前一日行五禮古者結婚始用行人告以夫家采擇之意謂之納采問女之名歸卜夫廟吉以告女家謂之問名納吉今選尚一出朝廷不待納采公主封爵已行

誕告不待問名若納成則既有進財請期則有司擇日宜稍依五禮之名存其物數俾知婚姻之事重而夫婦之際嚴如此亦不忘古禮之義也時充國公主下嫁李瑋詔賜出降曰令夫家主婚者具合用鴈幣玉馬等物陳於內東門外以授內謁者進入內侍掌事者受唯馬不入神宗即位詔以昔侍先帝恭聞德音以舊制士大夫之子有尚帝女者輒皆升行以避舅姑之尊豈可以富貴之故屈人倫長幼之序宜詔有司革之以厲風俗於是著為令仍命陳國長公主行舅姑之禮駙馬都尉王師約更不升行公主見舅

姑行禮自此始舊例長公主凡有表章不稱妾禮院
議謂男子婦人凡於所尊稱臣若妾義實相對今宗
室伯叔近臣悉皆稱臣即公主理宜稱妾况家人之
禮難施於朝廷請自大長公主而下凡上牋表各据
國封稱妾從王師約之請也康國公主下降太常寺
言按令公主出降申中書省請皇后帥官闈掌事人
送至第外命婦從今請如令詔出降日婉儀帥官闈
掌事者送至第外命婦免從徽宗改公主為姬下詔
曰在熙寧初有詔釐改公主郡主縣主名稱當時群
臣不克奉承近命有司稽考前世周稱王姬見於詩

雅姬雖周姓考古立制宜莫如周可改公主為帝姬郡
主為宗姬縣主為族姬其稱大長者為大長帝姬仍
以美名二字易其國號內兩國者以四字其出降日
壻家具五禮修表如上儀太史局擇日告廟親迎前
一日所司於內東門外量地之宜西向設壻次其壻
父醮子如上儀乃命之曰往迎肅雍以昭惠宗祐子
再拜曰祇率嚴命又再拜降出乘馬至東華門內下
馬禮直官引就次有司陳帝姬鹵簿儀仗於內東門
外候將升獻翟車引壻出次於內東門外躬身西向
掌事者執鴈內謁者奉鴈以進俟帝姬升車壻再拜

先還第同牢其日初昏掌事者設巾洗各二於東階
東南一於室北水在洗東尊於室中實四爵兩盃於
篚壻至本第下馬以俟帝姬至降車贊者引壻揖之
以入及寢門又揖導之升階入室盥洗掌事者布對
位又揖帝姬皆即坐受醴三飲俱興再拜贊者撤酒
見舅姑夙興帝姬著花釵服褕翟以俟見贊者設舅
姑位於堂上舅位於東姑位於西各服其服就位女
相者引帝姬升自西階詣舅位前再拜贊者以棗桌
授帝姬奉置舅位前舅即坐贊者進徹以東帝姬退
復位又再拜女相者引詣姑位前再拜贊者以服脩

授帝姬奉置姑位前姑即坐贊者亦微以東帝姬退復位又再拜次醴婦盥饋饗婦如儀

諸王納妃宋朝之制諸王聘禮賜女家白金萬兩敵

門綱古采之用羊二十口酒二十壺絲四十匹定禮羊

酒絲各加十茗百斤頭巾段綾絹三十匹黃金釵

釧四雙條脫一副真珠虎魄瓔珞真珠翠毛玉釵朶

各二副銷金生色衣各一襲金塗銀合二錦繡綾羅

三百匹果槃花粉花纂眠羊卧鹿花餅銀勝小色金

銀錢等物納財用金器百兩絲千匹錢五十萬錦綺

綾羅絹各三百匹銷金繡畫衣十襲真珠翠毛玉釵

朵各三副函書一架纏束帛押馬函馬二十匹羊五十口酒五十壺繫羊酒紅絹百匹花粉花幕果盤銀勝羅勝等物親迎用塗金銀裝肴一乘障坐障各方團掌扇四引障花十樹生色燭籠十高髻釵插笄童子八人騎分左右導扇輿其宗室子聘禮賜女家白金五千兩其敵門定禮納財親迎禮皆減半遠屬族卑者又減之政和三年四月議禮局上皇子納夫人儀采擇使者曰奉制某王之儻屬子懿淑謹之重之使某行采擇之禮賓者入告主人曰臣某之子顚愚不足以備采擇恭承制命臣某不敢辭問名使

者曰某王之儺采擇既諧將加官占奉制問名償者入告主人曰制以臣某之子可以奉侍某王臣某不敢辭告吉使者曰官占既吉奉制以告償者入告主人曰臣某之子愚弗克堪占貺之吉臣與有辛臣某謹奉典制告成使者曰官占云吉嘉偶既定制使其以儀物告成償者入告主人曰奉制賜臣以重禮臣某謹奉典制告期使者曰涓辰之良某月某日吉制使其告期償者入告主人曰臣某謹奉典制前期太史局擇日奏告景靈宮賜告前一日主人設使者次如常儀使者以內_{侍為之}又設告箱之次於中門外北向隨闕

所向設香案於寢庭其日大昕使者公服至主人出迎於大門外北向再拜使者不答拜謁者引使者入門而左主人入門而右舉告箱者同入主人立香案左使者在右舉告箱者以告置于香案女相者引夫人出面闕立使者稱有制女相者贊再拜使者曰賜某國夫人告又贊再拜退使者出皇帝醮戒於所御之殿皇子乘象輶親迎同牢夫人朝見盥饋皇帝皇后饗夫人如儀其諸王以下納采賓曰某官以伉儷之重施於某王某官謂主人某王謂婿某王率偕羮典以某將事敢請納采某王謂婿賓者入告主人曰某之子弗

閑於姆訓維是脮脩棗棗之饋未知所以告虔也某
聽命于廟敢不拜嘉問名賓曰合二姓之好必稽諸
龜筮敢請問名賓者入告主人曰某王恭謹重正昏
禮將以加諸卜某敢不以告納吉賓曰某王承嘉命
稽諸卜筮龜筮協從使某以告賓者入告主人曰某
王不忘寒素欲施德於某未教之女而卜以吉告其
曷敢辭納成賓曰某官以伉儷之重施於某王某王

謂
上
謂
婿父

率循彝典有不腆之幣以某將事敢請納

成賓者入告主人曰某王順彝典申之以備物某敢
不重拜嘉請期賓曰某王謹重嘉禮將卜諸近日使

某請期償者入告主人再辭償者出告賓曰某既不獲受命於某官某王得吉卜曰某日敢不以告償者入告主人曰謹奉命以從親迎前一日主人設賓次壻謂如常儀其日大昕壻之父服其服告於禴廟廟者設神位於廳諫子將行父醮之於廳事贊者設父不應設位者不諫子將行父醮之於廳事贊者設父位中間南向設子位父位之西近南東向父即坐子公服升自西階進立位前贊者注酒於醴西向授子子再拜跪受賛者又設饌父位前子舉酒興即坐飲食訖降再拜進立於父位前命之曰躬迎嘉偶釐爾內治子再拜曰敢不奉命又再拜降出詣女家主人

服其服告於禴廟如請期之儀賓將至主人設神位
於寢戶外之西設醴女位於戶內南向具酒饌賓至
贊者引就次女盛服於房中就位南向立姆位於右
從者陪其後父公服升自東階立於寢戶外之東西
向內贊者設酒饌女就位坐飲食訖降再拜內贊者
徹酒饌主人降立東階東南西面贊者引賓出次立
於門西東西面賓者進受命出請事賓曰某受命於父
以茲嘉禮躬聽成命賓者入告主人曰某固願從命
賓報揖主人入門而右賓入門而左執鴈者從入陳

薦於庭三分庭一在南北向主人升立于東階上西面賓升西階進當寢戶前北面再拜降出主人不降送賓初入門母出立於寢戶外之西南面賓拜訖姆引女出於母左父命之曰往之汝家以順為正無忘肅恭母戒之曰必恭必戒無違舅姑之命庶母申之曰爾誠聽於訓言無作父母羞女出門婿先還第其同牢廟見見舅姑諸禮皆如儀凡宗室婚姻治平中宗正司言宗室女舅姑夫族未立儀制皆當勑法詔婚家有二世食祿即許娶宗室女未仕者與判司簿尉已任者隨資序推恩即婚別祖女別房舊為婚姻

而於今卑尊不順者皆許壻之三代鄉貫坐月人材
書劄止令婚主問驗以告宗正寺大宗正司寺司詳
視如條保明所進財皆賜壻家令止於本宮納財媒
妁使令之人非理求苟許告宗室女事舅姑及見夫
之族親皆如臣庶之家其後又令宗室女再嫁者祖
父有二代任殿直若州縣官已上即許為婚姻熙寧
十年又詔應袒免以上親不得與雜類之家婚嫁謂
舅嘗為僕姑嘗為婦者若父母係化外及見居沿邊
兩屬之人其子孫亦不許為婚繼麻以上親不得與
諸司胥吏出職納粟得官及進納伎術工商雜類惡

逆之家子孫通婚後又禁刑徒子孫為婚應婚嫁者委主婚宗室擇三代有任州縣官或殿直以上者列姓名家世州里歲數奏上宗正司驗實召保付內侍省宣繫聽期而行嫁女則令其婿召保其冒妄成婚者以違制論主婚宗室與媒保同坐不以赦降自首者減罪告者有賞非袒免親者依庶姓法宗室離婚委宗正司審察若於律有可出之實或不相安方聽若無故据拾者劾奏如許聽離追完賜予物給還嫁資再娶者不給賜非袒免以上親與夫聽離再嫁者委宗正司審核其恩澤已追奪而乞與後夫者降一等尋詔宗

女母得與嘗娶人結婚再適者不用此法

品官婚禮納采問名納吉納成請期親迎同牢廟見
見舅姑姑醴婦盥饋饗婦送者並如諸王以下婚四
品以下不用盥饋饗婦禮

士庶人婚禮并問名於納采并請期於納成其無薦
奠者三舍生聽用羊庶人聽以雉及鷄鶩代其辭稱
吾子親迎質明掌事者設禡位廳事東間南向壻之
父服其服北面再拜祝曰某子某年若干禮宜有室
聘某氏第幾女以其日親迎敢告子將行父坐廳事
南向子服其服三舍生及品館子孫假九品服餘並皂
衣折上巾立父位西

少南東向贊者注酒於醕授子子再拜跪受贊者又以饌設位前子舉酒興即坐飲食訖降再拜進立父位前命之曰釐爾內治徃求爾匹子再拜曰敢不奉命又再拜降出初婚掌事者設酒饌室中置二醕於槃壻服其服如前服至女家贊者引就次掌事者設禰位主人受禮如請期之儀姓人謂女盛服立房中父升階立房外之東西向非南向者各隨其所向父立於門外之左餘故此贊者注酒於醕授女女再拜受醕贊者又以饌設於位前女即坐飲食訖降再拜父降立東階下賓出次贊謂主人迎于門揖賓入賓報揖從入主人升東階

西面賓升西階進當房之前北面掌事者陳薦于階
賓曰某受命於父以茲嘉禮躬聽成命主人曰某固
願從命賓再拜降出主人不降送初女出父戒之曰
往之汝家無忘肅恭母戒之曰夙夜以思無有違命
諸母申之曰無違爾父母之訓女出婿先還俟于門
外婦至贊者引就北面立婿南面揖以入至於室掌
事者設對位室中婿婦皆即坐贊者注酒於醕授婿
及婦婿及婦受醕飲訖迎設饌再飲三飲並如上儀
婿及婦皆興再拜贊者撤酒饌見祖禱見舅姑禮婦
饗送者如儀

志卷第六十八

志卷第六十九

宋史一百十六

開儀同司上贊錄軍國重事前書奏丞相監修國史領經筵事都繫長勝等奉

黎修

禮十九賓禮一

大朝會儀
常朝儀

周官司儀掌九儀賓客擯相詔王南鄉以朝諸侯大行人掌大賓之禮大客之儀以親諸侯蓋君臣之際體統雖嚴然而接以仁義攝以威儀實有賓主之道焉是以小雅鹿鳴燕其臣下皆以嘉賓稱之宋之朝儀政和詳定五禮列為賓禮今修宋史存其舊云

大朝會宋承前代之制以元日五月朔冬至行大朝會之禮太祖建隆二年正月朔始受朝賀於崇元殿服袞冕設宮縣侍衛如儀仗退群臣詣皇太后宮門奉賀帝常服御廣德殿群臣上壽用教坊樂五月朔受朝賀於崇元殿帝服通天冠絳紗袍宮縣儀仗如元會儀乾德三年冬至受朝賀於文明殿四年於朝元殿賀畢常服御大明殿群臣上壽始用雅樂登歌二舞群臣酒五行罷太宗淳化三年正月朔命有司約開元禮定上壽儀皆以法服行禮設宮縣萬舞酒三行罷真宗咸平三年五月朔雨命放仗百官常服

起居於長春殿退詣正衙立班宣制仁宗天聖四年
十二月詔明年正月朔先率百官赴會慶殿上皇太
后壽酒畢乃受朝天安殿仍令太常禮院修定儀制
五年正月朔曉漏未盡三刻宰臣百官與遼使諸軍
將校並常服班會慶殿內侍請皇太后出殿後幄鳴
鞭升坐又詣殿後皇帝幄引皇帝出帝服韁袍於簾
內北向褥位再拜跪稱臣某言元正啓祚萬物惟新
伏惟尊號皇太后陛下膺時納祐與天同休內常侍
承旨答曰履新之祐與皇帝同之帝再拜詣皇太后
御坐稍東內給侍酌酒授內謁者監進帝跪進訖以

盤興內謁者監承接之帝却就袴位跪奏曰臣某稽首言元正令節不勝大慶謹上千萬歲壽再拜內常侍宣答曰恭舉皇帝壽酒帝再拜執盤侍立教坊樂止皇帝受虛醴還幄通事舍人引百官橫行典儀贊再拜舞蹈起居太尉升自西階稱賀簾外降還位皆再拜舞蹈侍中承旨曰有制皆再拜宣曰履新之吉與公等同之皆再拜舞蹈閣門使簾外奏宰臣某以下進壽酒皆再拜太尉升自東階翰林使酌御酒盞授太尉執盞盤跪進簾外內謁者監跪接以進太尉跪奏曰元正令節臣等不勝慶抃謹上千萬歲壽降

還位皆再拜宣徽使承旨曰舉公等觴皆再拜太尉
升立簾外樂止內謁者監出簾授虛盞太尉降階橫
行皆再拜舞蹈宣徽使承旨宣群臣升殿再拜升及
東西廂坐酒三行侍中奏禮畢退樞密使以下迎乘
輿於長春殿起居稱賀百官就朝堂易朝服班天安
殿朝賀帝服袞冕受朝禮官通侍舍人引中書令門
下侍郎各於案取所奏文詣褥位脫劍舄以次升分
東西立諸方鎮表祥瑞案先置門外左右令使絳衣
對舉給侍中押祥瑞中書侍郎押表案入分詣東西
階下對立既賀更服通天冠絳紗袍稱觴上壽止舉

四爵乘輿還內恭謝太后如常禮神宗元豐元年詔
龍圖閣直學士史館脩撰宋敏求等詳定正殿御殿
儀注敏求遂上朝會儀二篇令式四十篇詔頒行之
其制元正冬至大朝會有司設御坐大慶殿東西旁
于御坐之左右少北東西閣于殿後百官宗室客使
次于朝堂之內外五輅先陳于庭兵部設黃麾仗于
殿之內外大樂令展宮架之樂于橫街南鼓吹令分
置十二案于宮架外協律郎二人一位殿上西階之
前檻一位宮架西北俱東向陳輿輦御馬于龍墀繖
扇于沙墀貢物于宮架南冬至不設貢物餘則列大慶門外

冬至不設給事中位祥瑞案

陳布將士于街左右金吾六軍諸衛勒所部列黃麾
大仗于門及殿庭百僚客使等俱入朝文武常參官
朝服陪位官公服近仗就陳于閣外大樂令樂工協
律郎入就位中書侍郎以諸方鎮表案給事中以祥
瑞案俟于大慶門外之左右

冬至不設給事中位祥瑞案

諸侍衛

官各服其器服輦出至西閣降輦符寶郎奉寶詣閣
門奉迎百官客使陪位官俱入就位侍中版奏中嚴
又奏外辦殿上鳴鞭宮縣撞黃鐘之鐘右五鐘皆應
律郎舉麾奏乾安樂鼓吹振作帝出自西房降輿即
內侍承旨索扇扇合帝服通天冠絳紗袍御輿出協

坐扇開殿下鳴鞭協律郎偃麾樂止爐煙升符寶郎
奉寶置御坐前中書侍郎給事中押表案祥瑞案入
詣東西階下對立百官宗室及遼使班分東西以次
入正安樂作就位樂止押樂官歸本班起居畢復案
位三師親王以下及御史臺外正任遼使俱就北向
位典儀贊在位者皆再拜起居訖太尉將升中書令
門下侍郎俱降至兩階下立凡太尉行則樂至位樂止太尉詣
西階下解劍脫舄升殿中書令門下侍郎各於案取
所奏之文詣禱位解劍脫舄以次升分東西立以俟
太尉詣御坐前北向跪奏文武百寮太尉具官臣某

等言元正啓祚萬物咸新

冬至易為晷運推移日南長至

伏惟皇帝

陛下應乾納祐與天同休俛伏興降階佩劍納馬餘
準還位在位官俱再拜舞蹈三稱萬歲再拜侍中進
當御坐前承旨退臨階西向稱制宣答曰履新之慶
冬至易為晷運推移日南長至
復長之慶與公等同之贊者曰拜舞蹈三稱萬歲橫
行官分班立中書令門下侍郎升詣御坐前各奏諸
方鎮表及祥瑞訖戶部尚書就承制位俛伏跪奏諸
州貢物請付所司禮部尚書奏諸蕃貢物如之司天
監奏雲物祥瑞請付史館皆如上儀侍中進當御坐
前奏禮畢殿上承旨索扇殿下鳴鞭宮縣撞鍾賓之

鐘左五鐘皆應協律郎舉麾宮縣奏乾安樂鼓吹振
作帝降坐御輿入自東房扇開偃麾樂止侍郎奏解
嚴百官退還次客使陪位官並退有司設食案大樂
令設登歌殿上二舞入立于架南預坐當升殿者位
御坐之前文武相向異位重行以北為上非升殿者
位于東西廊下尚食奉御設壽尊于殿東楹少南設
坫于尊南加爵一有司設上下群臣酒尊于殿東楹
廂侍衛官及執事者各立其位仗衛仍立俟上壽百
官立班如朝賀儀侍中版奏中嚴外辦聞鳴鞭索扇
帝服通天冠絳紗袍御輿出東房樂作帝即坐扇開

樂止贊拜畢光祿卿詣橫街南跪奏具官臣其言請
允群臣上壽興侍中承旨稱制可少退舍人曰拜光
祿卿再拜訖復位三師以下就位贊者曰拜在位者
皆拜舞三稱萬歲太尉升殿詣壽尊所北向尚食奉
御酌御酒一爵授太尉搢笏執爵詣前跪進帝執爵
太尉出笏俛伏興少退跪奏文武百寮太尉具官臣
某等稽首言元正首祚臣等不勝大慶謹上千萬壽
俛伏興降復位贊者曰拜在位者皆再拜三稱萬歲
侍中承旨退西向宣曰舉公等觴贊者曰拜在位者
皆再拜三稱萬歲北向班分東西序立太尉自東階

侍立舉第一爵和安樂作飲畢樂止太尉受虛爵復
於坫降階三師以下贊拜舞蹈稱萬歲如上儀侍中
進奏侍中具官臣某言請延公王等升殿俛伏興降
復位侍中承旨退稱有制贊者曰拜在位者皆再拜
宣曰延公等升殿贊者曰拜在位者皆再拜公王等
詣東階升立於席後尚食奉御進酒殿中監省酒以
進帝舉第二爵登歌作甘露之曲飲訖殿中監受爵
樂止群臣升殿就橫行位舍人曰各賜酒贊者曰拜
群官皆再拜三稱萬歲舍人曰就坐太官令行酒措
笏受酒宮縣作正安之樂文舞入立宮架北觴行一

周凡行酒訖並太官令奏巡周樂止尚食進食升階
以次置御坐前又設群官食訖太官令奏食徧太樂
丞引盛德升聞之舞入作三變止出殿中監進第三
爵群官立席後登歌作瑞木成文之曲飲訖樂止殿
中丞受虛爵舍人曰就坐群官皆坐又行酒作樂進
食如上儀太樂丞引天下大定之舞作三變止出殿
中監進第四爵登歌奏嘉禾之曲如第三爵太官令
行酒又一周樂止舍人曰可起百寮皆立席後侍中
進御坐前跪奏禮畢俛伏興與群官俱降階復位贊
者曰拜皆再拜舞蹈三稱萬歲起分班立殿上索扇

扇合殿下鳴鞭太樂令撞蕤賓之鐘左右鐘皆應協
律郎俛伏舉麾太樂令令奏乾安之樂鼓吹振作帝
降坐御輿入自東房扇開樂止侍中奏解嚴所司承
旨放仗百寮再拜相次退舊制朝賀上壽帝執鎮圭
至是始罷不用元祐八年太常博士陳祥道言貴人
賤馬古今所同故覲禮馬在庭而侯氏升堂致命聘
禮馬在庭而賓升堂私覲今元會儀御馬立於龍墀
之上而特進以下立於庭是不稱尊賢才體群臣之
意請改儀注以御馬在庭於義為允舊制五月朔受
朝熙寧二年詔罷之元符元年四月得傳國受命寶

禮官言五月朔於故事當大朝會之就是日行受寶之禮依上尊號寶冊儀前一日帝齋于殿內翼日服通天冠絳紗袍御大慶殿降坐受寶群臣上壽稱賀其後徽宗以元日受八寶及定命寶冬至日受元圭皆于大慶殿行朝賀禮新儀成改元豐儀太尉為上公侍中為左輔中書令為右弼太樂令為大晟府盛德升聞為天下化成之舞天下大定為四夷來王之舞及增刑部尚書奏天下斷絕請付史館餘並如舊儀凡遇國恤則廢若無事不視朝則下敕云不御殿群臣進表稱賀于閭門紹興十二年十月臣僚言竊

以元正一歲之首冬至一陽之復聖人重之制為朝賀之禮焉自上世以來未之有改也漢高祖以五年即位而七年受朝于長樂宮我太祖皇帝以建隆元年即位受朝于崇元殿主上臨御十有六年正至朝賀初未嘗講艱難之際宜不遑暇茲者太母還宮國家大慶四方來賀曾惟其時欲望自今元正冬至舉行朝賀之禮以明天子之尊庶樂舊典不至廢墜禮部太常寺考定朝會之禮依國故事設黃麾大仗車輅法物樂舞等百寮服朝服再拜上壽宣王公升殿間飲三周詔自來年舉行十一月權禮部侍郎王賞

等言朝會之制正旦冬至及大慶受朝受賀係御大慶殿其文德紫宸垂拱殿禮制各有不同月朔視朝則御文德殿謂之前殿正衙仍設黃麾半仗紫宸垂拱皆係側殿不設儀仗元正在近大慶殿之禮事務至多乞候來年冬至別行取旨詔從之明年閣門言依汴京故事遇行大禮則冬至及次年正旦朝會皆罷十四年九月有司言明年正旦朝會請權以文德殿為大慶殿合設黃麾大仗五千二十七人欲權減三分之一合設八寶於御坐之東西及登歌官架樂舞諸州諸蕃貢物行在致仕官諸路貢士舉首並令

立班詔從之十五年正旦御大慶殿受朝文武百官朝賀如儀

常朝之儀唐以宣政為前殿謂之正衙即古之內朝也以紫宸為便殿謂之入閣即古之燕朝也而外又有含元殿含元非正至大朝會不御正衙則日見群臣百官皆在謂之常參其後此禮漸廢後唐明宗始詔群臣每五日一隨宰相入見謂之起居宋因其制皇帝日御垂拱殿文武官日赴文德殿正衙曰常參宰相一人押班其朝朔望亦於此殿五日起居則於崇德殿或長春殿中書門下為班首長春即垂拱也

至元豐中官制行始詔侍從官而上日朝垂拱謂之常參官百司朝官以上每五日一朝紫宸為六參官在京朝官以上朔望一朝紫宸為朔參官望參官遂為定制

正衙常參國朝之制兩省臺官文武百官每日赴文德殿立班宰臣一員押班常朝官有詔旨免常朝及勾當更番宿者不赴遇假併三日以上即橫行參假宰臣參知政事及免常朝者悉集事務急速赴橫行不及者牒報臺坊遇親王使相過正衙則取別旨群官見謝辭者皆赴正衙其日文武班尚書上將軍以下並先叙立於殿門之外東西相

向品一班二正衙見謝辭官立於大班之南右巡

品不叙立

使立正衙位南北向臺官大夫中丞三院御史各就

捐班位再揖

三院不全捐訖

臺官與左巡使先入各就位

左右巡使立鐘鼓樓下左巡使奏武班右巡使奏文班如只巡使一員即就入班南立單奏如俱關即於臺官或員外郎以下差攝

次兩班及右巡使入次見謝辭官

入次兩省官入

兩省官自殿西偏門入於右勳政門

北偏門立候文武班將至循午階就位

位次文班一品二品入次宰臣出東上閣門就位通

事舍人一員立於閣門外北向四色官立其後舍人

通承旨奉敕不坐四色言應喏急趨至放班位宣敕

在位官皆再拜而退其應橫行者班定通事舍人揖

群官轉班北向舍人揖再拜復位如常朝之儀

兩省官幕

大舊在中書門外近制就使將軍幕次凡見謝辭官

新受加恩出使到關

權就朝堂門南上將軍幕次凡見謝辭官

新受加恩出使到關

者宰臣親王使相

俟班位西向立定先赴午階南中書

門下正衙位再樞密使副使知院同知院簽書院事

拜却還押班位

參知政事宣徽使宗室節度使以下至刺史將軍

俟班

定四方館吏引出東上閣門至殿庭由東黃道赴正衙位北向以西為首將軍以東為首正衙畢宰臣樞密

密出西便門親王宗室入東上閣門觀文殿大學士資政殿大學士觀

文殿學士三司使翰林資政侍講侍讀學士直學士

知制誥待制

直學士以上集永郎幕次持制集上將軍幕次俟班定四方館吏引入殿西便

門赴班於大門下中書侍郎至正言四方館吏引先夫中丞前出

班定於一品二品官未就位前先就位放班訖由西偏門出

御史大夫至御史班

序

如常朝三師三公僕射東宮三師三少班入殿門朝堂

吏引入殿東便

門赴班於兩省臺官前出尚書丞郎左右金吾上將軍至將軍

序

班

如常朝節度使至刺史軍職兩廂都指揮使以上三司副使文班

京官武官郎將以上分司官樞密都承

旨諸使副醫官帶正員官者並文東武西相向重其行序立餘如常朝

權三司使開封府吏部銓祕書監修撰直館閣校理檢討三司判官主判官開封府判官推官官僚內職軍校領郡者內客省使至通事舍人節度行軍司馬至團練副使幕職上佐州縣官諸司勤留官新受者

京朝官改賜章服者致仕責授降授並謝行軍副使仍辭
朝官貢舉發解畢者亦見準儀制知貢舉官合謝辭近歲皆即時鎖宿故謝辭

停皆

垂拱殿起居則內侍省都知押班率內供奉官以下
并寄班等先起居次客省閣門使以下呈進目者次三班
使臣節度觀察防禦團練刺史等子弟充供奉官侍禁殿直有旨令內朝起居者次內殿
當直諸班殿直散員散旨為散都頭金槍班等次長入祇候東西班殿侍次御前忠佐次殿前都指揮使
率軍校至副指揮使次駙馬都尉任刺史以上者綏本班次諸
王府僚次殿前都軍使都頭次皇親將軍以下至殿

直次行門指揮使率行門起居以上並內侍贊喝如傳宣前
殿不坐即宰相樞密使文明殿學士三司使翰林樞
密直學士中書舍人三司副使知起居注皇城內監
庫歲朝官諸司使副內殿崇班供奉官侍禁殿直翰
林醫官待詔等同班入次親王侍衛親軍馬步軍都
指揮使率軍校至副都指揮使次使相次節度使次
統軍次兩使留後觀察使次團練防禦使刺史次侍
衛馬步軍使都頭起居畢見謝班入如御崇德殿即紫
宸殿立餘皆止面也即樞密使以下先就班候升坐諸司使副以下至殿直分東西

宰相參知政事最後入門

以上並閣門贊喝

日

長對立春殿階北面

止再拜朔望及三日假樞密使以下皆舞蹈早朝則
宰相樞密宣徽使起居畢升殿問聖體宰相奏事樞
密宣徽使退候宰相對畢樞密使復入奏事次三司
開封府審刑院及群臣以次登殿大兩省以上領務
即師有公事許即時請對自餘受使出入要切者欲回奏事則聽先進取旨
其見謝辭官以次入于庭凡見者先之謝次之辭又次之出使閑慢或未升門階上及升殿止拜御坐前餘皆庭中班次惟宰相親王使相赴崇德殿即宣徽使通喚餘皆側立候通
再拜舞蹈致辭即不舞蹈見即将相升殿問聖體其
賜分物酒食及收進奉物皆舞蹈稱謝凡收進奉幕皆入謝

職州縣官謝辭即判銓官引對兼於殿門外宣辭戒勵凡國有大慶瑞及出師勝捷樞密使率內職軍校入賀致辭閣門使宣答宰相致辭宣徽使宣答如賜酒即預坐官後入作樂送酒如曲宴之儀晚朝則宰相樞密翰林學士當直者洎近侍執事之臣皆赴乾德六年九月始以旬假日御講武殿又名近臣但赴早參宰相以下繫帶諸司使以下繫帶其節假及大祀並令如式開寶九年四月詔旬休日不視事及太宗即位復如舊視朝退進食訖則易服御崇政殿先群臣告謝次軍頭引見司奏事于殿下次三班審官院流內銓刑部

及諸司引見官吏如假日起居辭見畢即移御坐臨
軒視事既退復有奏事或閱器物之式者謂之後殿
再坐淳化三年令有司申舉十五條常參文武官或
有朝堂行私禮跪拜待漏行立失序談笑喧譁入正
衙門執笏不端行立遲緩至班列行立不正趨拜失
儀言語微喧穿班仗出閣門不即就班無故離位廊
下食行坐失儀入朝及退朝不從正衙門出入非公
事入中書犯者奪奉一月有司振舉拒不伏者錄奏
貶降景德二年光祿寺丞錢易言竊覩文德殿常朝
班不及三四十人蓋以凡掌職務止赴五日起居頗

違舊章望令並赴朝參乃詔應三館祕書閣尚書省二十四司諸司寺監朝臣內殿起居外並赴文德殿常參其審刑院大理寺臺直官開封府判官推官司錄兩縣司天監翰林天文監倉場庫務等仍免大中祥符二年御史知雜趙湘言伏見常參官每日趨朝多不整肅舊制並早赴待漏院候開內門齊入伏緣每日迨辰以朝以故後時方入又風雨寒暑即多稱疾宜令知班驅使官視其入晚者申奏疾者遣醫親視天禧四年十月中旬書門下言唐朝故事五日一開延英隻日視事雙日不坐方今中外晏寧政刑清簡

望準舊事三日五日一臨軒聽政隻日視事雙日不坐至於刑章錢穀事務遣差臣僚除急切大事湏面對外餘並令中書樞密院附奏詔禮儀院詳定雙日前後殿不坐隻日視事或於長春殿或於承明殿應內殿起居群臣並依常日起居餘如中書門下之儀俄又請隻日承明殿常朝依假日便服視事不鳴鞭詔可康定初詔中書樞密三司大節大忌給假一日小節旬休並後殿奏事前後毋得過五班餘聽後殿對御厨給食假日崇政殿辰漏上入內進食俟再坐復對神宗即位御史中丞王陶以皇祐編敕宰臣押

班儀制移中書謂天子新即位大臣不應隨發朝儀
不報舊制祖宗以來日御垂拱殿待制諸司使以上
俱赴而百官班文德殿曰常朝五日皆入曰起居平
時宰相垂拱殿奏事畢赴文德殿押班或日晏未退
則閣門傳宣放班多不復赴王陶以韓琦曾公亮違
故事不抑班為不恭劾之琦公亮上表待罪且言唐
及五代會要月九開延英則餘日宰相當押正衙班
及延英對日未御內殿前傳宣放班則宰相不押正
衙班明矣自祖宗繼日臨朝宰相奏事至祥符初始
詔循故事押文德班以妨職浸廢乃至今日請下太

常禮院詳定陶坐紩司馬光代為中丞請令宰相遵
國朝舊制押班不湏詳定尋詔宰相春分辰初秋分
辰正垂拱殿未退聽勿赴文德殿令御史臺放班光
又言垂拱奏事畢春分以後鮮有不過辰初秋分以
後鮮有不過辰正然則自今宰臣常不至文德殿押
班請春分辰正秋分已初奏事未畢即如今詔庶幾
此禮不至遂廢迺詔春秋分率以辰正熙寧六年正
月西上閣門副使張誠一言垂拱殿常朝先內侍唱
內侍都知以下至宿衛行門計一十八班起居後通
事舍人引宰執樞密使以下大班入次親王次侍衛

馬步軍都指揮以下次皇親使相以下十班入方引
見謝辭或遇百官起居日自行門後通事舍人引樞
密以下次親王使相以下至刺史十班入方奏兩巡
使起居立定方引兩省官入次閣門引宰臣以下大
班入起居畢候百官出絕兩省班出次兩巡使出中
書樞密方奏事已是日高况大班本不分別丞郎給
諫臺省及常參官今獨使相以下曲為分別虛占時
刻請遇垂拱殿百官起居日將親王以下十班合為
四班親王為一班侍衛馬步軍都指揮使為一班皇
親使相以下至刺史重行異位為兩班可減六班如

垂拱殿常朝不係百官起居或紫宸殿百官起居其親王使相以下班並依舊儀序入起居從之九月引進使李端憲言近朔望御文德殿視朝祁寒盛暑數煩清蹕而紫宸之朝歲中罕御請朔日御文德既望坐紫宸廣幾正衙內殿朝儀並舉從之元豐八年二月詔諸三省御史臺寺監長貳開封府推判官六參職事官赤縣丞以上寄祿升朝官在京釐務者望參不釐務者朔參哲宗元祐四年十月以戶部尚書呂公孺言詔朔參官兼赴望參望參官兼赴六參五年詔權侍郎並日參紹聖四年十月御史臺言外任官

到闕朝見訖並令赴朔望參尋又言元豐官制朝參班序有日參六參望參朔參已著為令元祐中改朔參兼赴望參望參兼赴六參有失先朝分別等差之意止依元豐儀今從之政和詳定五禮新儀有文德殿月朔視朝儀紫宸殿望參儀垂拱殿四參儀紫宸殿日參儀垂拱殿日參儀崇政殿再坐儀崇政殿假日起居儀其文不載中興仍舊制乾道二年九月閣門奏垂拱殿四參四參官謂宰執侍從武臣正任文臣卿監員郎監察御史已上皇帝坐先讀奏目知閣以下次御帶環衛官以下次忠佐殿前都指揮使以下次殿前司員僚次皇太子次

行門已上逐班並常起居次樞密學士待制樞密都
承旨以下知閣并祇應武功大夫以下通班常起居
次親王次馬步軍都指揮使次使相次馬步軍員僚
已上逐班並常起居次殿中侍御史入側宣大起居
訖歸侍立位次宰執以下並兩省官文臣百官入相
向立定通班面北立大起居訖凡常起居兩拜
大起居七拜三省升殿侍立次兩省官出次殿中侍御史對揖出三省
樞密院奏事次引見謝辭次引臣僚奏事訖皇帝起
詔今後遇四參日分起居班次可移殿中侍御史及
宰執以下百官班令次樞密以下班起居却令親王

并殿前都指揮使以下殿前司員僚逐班於宰執以下班後起居餘並從之淳熙七年九月詔自今垂拱致日參宰臣特免宣名嘉定十二年正月臣僚奏竊見皇帝御正殿或御後殿固可間舉四參官亦有定日近者每日改常朝為後殿四參之禮亦多不講正殿後殿四參間免陛下臨朝之日固未嘗輶而外廷不知聖意或謂姑從簡便非所以肅百執事也常朝之禮止於從臣後殿之儀從臣不與四參止及卿郎而乃累月僅或一舉咫尺天威竦簡至此非所以尊君上而勵百辟也伏願陛下嚴常朝後殿四參之禮

起群下肅謹之心彰明時厲精之治豈不偉哉從之初群臣見辭謝皆赴正衙淳化二年知雜御史張郁言正衙之設謂之外朝凡群臣辭見及謝先詣正衙見訖御史臺具官位姓名以報閣門方許入對此國家舊制也自乾德後始詔先赴中謝後詣正衙而文武官中謝後次日並赴正衙內諸司遙領刺史閣門通事舍人以上新授者亦赴正衙辭謝出使急速免衙辭者亦具狀報臺違者罰奉一月其內諸司職官并將校至刺史以上新授者欲望同百官例赴正衙謝後之元豐既定朝參之制侍御史知雜事蒲中行

上言文德正衙之制尚存常朝之虛名襲橫行之謬
例有司失於申請未能釐正兩省臺官文武百官赴
文德殿東西相向對立宰臣一員押班聞傳不坐則
再拜而退謂之常朝遇休假併三日以上應內殿起
居官畢集謂之橫行自宰臣親王以下應見謝辭者
皆先赴文德殿謂之過正衙然在京釐務之官例以
別敕免參宰臣押班近年已罷而武班諸衙本朝又
不常置故今之赴常朝者獨御史臺官與審官待次
階官而已今垂拱內殿宰臣以下既已日參而文德
常朝仍復不廢舛謬倒置莫此為甚至於橫行參假

與夫見謝辭官先過正衙雖沿唐之故事然必俟天
子御殿之日行之可也詔下詳定官制所言今天子
日聽政於垂拱以接執政官及內朝之臣而更於別
殿宣敕不坐實為因習之誤兼有執事升朝官五日
一赴起居而未有執事者反謂之參疏數之節尤為
未當又辭見謝自己入見天子則前殿正衙對拜為
虛文其連遇朝假則百官司赴大起居不當復有橫
行參假宜如中行言於是常朝正衙橫行之儀俱罷

志卷第六十九

志卷第六十九
卷六十九
王氏刊